



पत्मोस टापु

## प्रकाश

**ब्रेक्ब मुर:** एको किताब येसु आ शेंसीब यूहन्ना आ ब्रेक्शो बाक्ब। थमा सुइक्ब आन गुम्तीके डा इतिहासम मोदेशो ब्रेक्शो बाक्त।

**गेना ब्रेक्शो:** इरेनेयुस, थमा सुइक्ब आन इतिहास ब्रेक्बमी “प्रकाश सासन पाइब दोमीतीयन आ सासन पशो नुप्ची ना ब्रेक्शो बाक्ब” देंब। मेको ६४-६५ ए. डी. मेर बाक्त।

**मार ब्रेक्शो:**

१. प्रभु येसु ख्रीस्त नु मेको कली थमा सुइक्ब आन गुम्तीके। प्रकाश १:- ३:-
२. प्रभु येसु ख्रीस्त नु रागी रागी डा मुर प्रकाश ४:-; - ११:१४
३. सैतान नु थमा सुइक्ब आन जोरी सत्रु प्रकाश ११:१५; - १४:२०
४. थमा सुइक्ब आन जोरी सत्रु ब्रुशो प्रकाश १५:१; - १६:२१
५. येसु ख्रीस्त नु आ राज्य प्रकाश २०:१; - २२:२१

## डोंइती डा लोव्र

१ परमप्रभु यावेमी येसु ख्रीस्त कली “मार मार दुम्या चिक्ता, आ रागी डा वाइलीम वाइलपुकीमी तुइक्तमेक्ल” दे कोंइताक्व। मिनु येसु ख्रीस्तमी आ स्वर्ग डा गेय पाइब कली आ वाइल यूहन्ना आ बाक्तीके सोइक्ताक्व। मारदे सोइक्ताक्व देशा हना, मेको दुम्यचशो लोव्र शेंथ सोइक्ताक्व। २मिनु गो यूहन्नामी, परमप्रभु यावे आ लोव्र नेंता, येसु ख्रीस्त आ पशो ताता। मिनु मेको नेल्ल आन सांकछी दुम्ती। ३मिनु सु सुमी परमप्रभु यावेमी तुइक्पाइशो एको किताब डा लोव्र पढेनीमी, नेंनीमी नु टीनीमी, मेको आसीक रशो नु ग्येरसीशो मुर दुम्नीम। मारदे हना मेको लोव्र दुम्यचशो बाक्त।  
१यूहन्ना १:१-२; यूहन्ना २१:२४; प्रकाश २२:१०

## एसीया डा गुम्तीके कली चिठी

४गो यूहन्नामी एसीया डा येसु ख्रीस्त कली थमा सुइक्व ७ ओटा सहर डा थमा सुइक्व आन गुम्तीके डा शेंब आन कली चिठी ब्रेक्ताक्व। मिनु मुल बाक्व, डोंइती बाक्वशो, नोले यो जाक्वमी नु परमप्रभु यावे आ ठेयब नित्तीके आ डोंइती बाक्व ७ ओटा ठांउ डा परमप्रभु यावे आ सोक्तीमी इन कली “शिशो तशा नु थुं नाइशशा बाक्वा तामेक्ल” देंताक्व। प्रस्थान ३:१४-१५; प्रकाश ३:१; प्रकाश ५:६ ५मिनु येसु ख्रीस्तमी यो मो देंत। मिनु मेको सु बाक्व देशा हना, परमप्रभु यावे आ देशो थमा पाइब सांकछी नु नेल्ल क्येडा डोंइती बेक्वशो रे सेंसीशो नु रागी डा पिप आन कली सासन पाइब बाक्व। येसु ख्रीस्तमी इं कली दाक्शा, आ हुशेमी इं पाप रे प्रोंइतु। प्रकाश ३:१४;

यूहन्ना १८:३७; १तिमोथी ६:१३ ६इं कली परमप्रभु यावे, आ आफ आ राज्य डा मुर सेल्शा, परमप्रभु यावे आ डोंइती राप्ब सेल्लतु। मोपतीके आ छेडछेड नु सक्ति गेना हना यो बाक्व, आमेन। प्रकाश ५:१०; प्रस्थान १६:६; १पत्रुस २:५,६ ७मिनु येसु ख्रीस्त लेशशा, दोपा यीबा देशा हना, सरीड रे गोस्सुमी गिल्सीशा यीब। मिनु मुर नेल्लेमी मेको कली यिन यिन पशो ताइनीम। मेको कली साइक्पाइक्वपुकीमी यो ताइनीम। मिनु थर थर डा मुरपुकीम मेको कली तशा, रोंका पा डाक्नीम। एको थमा लोव्र बाक्व। आमेन। मती २४:३०; जकरिया १२:१०;

यूहन्ना १६:३७

८परमप्रभु यावे मुल बाक्व, डोंइती यो बाक्वशो बाक्त। मिनु नोले यो जाक्व। नेल्ल सक्ति पाइशो परमप्रभु यावेमी “गो आल्फा नु ओमेगा नड” देंत। आल्फा नु ओमेगा माइशो ग्रीक लोव्रमी डोंइती नु नोले डा अच्छेर बाक्नीस। प्रकाश २१:६; यसेया ४१:४; प्रकाश ४:८

## येसुमी यूहन्ना कली पपाइशो गेय


९मिनु गो इन लोक्व यूहन्ना, येसु ख्रीस्त कली थमा सुइक्व नड। गो इन बुदी श्येत जशो परमप्रभु यावे आ राज्य डा मुर यो नड। मोपतीके श्येत जशा, इन खोदेशो पा येसु ख्रीस्त कली रिम्शा बाक्नुड। गो येसु आ सांकछी दुम्ती। मिनु परमप्रभु यावे आ लोव्र शेंताक्व। मोपतीके मुरुमी आं कली पत्मोस माइशो टापुमी लाइशशा प्रोंइतीमी। १०मिनु गो परमप्रभु यावे आ नाक्त परमप्रभु यावे आ सोक्तीम बाक्ती। मिनु आं नोले तुराही ताप्शो खोदेशो ठेयब सेंदा नेंता। ११मेको सेंदामी आं कली “मार मार ताइनेवे, मेको नेल्ल कागजम ब्रेक्तो। मिनु ब्रेक्शा डा मिन, एसीया डा ७ ओटा

सहर डा येसु ख्रीस्त कली थमा सुइक्व आन गुम्तीके डा मुर आन कली सोइक्वतो। मेको ७ ओटा सहर चहिं एफिसस, स्मिरना पेरगामोम, थिआटीरा, सारडीस, फिलाडेल्फीया नु लाओडीसीया नम” देंत। १२मिनु गो नु लोव्र पाइब कली कोव्रडु, दे बिर लेत्ती। लेशशा कोव्रडुनु, ७ ओटा सुन के दियारीम बत्ती ब्रशो ताता। १३मेको ७ ओटा दियारी आन दातेमी मुर का बाक्शो खोदेशो ताता। मेको मुर दोदेशो तांइसाक्व देंशा हना, खोइली सम्म लाइशो वा फेक्शो नु सुन के किप्तीके कुचुमी किप्शो बाक्वत। प्रकाश २:१; दानीएल ७:१३ १४मेको आ पिया नु आ चां बुश ऊन नु फुं खोदेशो बुश तांइसाक्व। आ मिक्च हुरु पा ब्रशो मी खोदेशो तांइसाक्व। प्रकाश २:१८; प्रकाश १६:१२ १५आ खोइली याप्पाइशशा टल्केशो कांसा खोदेशो तांइसाक्व। मिनु आ सेंदा ठेयब खोला आन रेयके खोदेशो नेंसाक्व। १६मिनु मेको आ ग्युरा गुइमी ७ ओटा सोरुल शेशो बाक्वत। मिनु निम्फा गे क्योरतीक पाइशशो हेशशो तरवार का आ शोव्र रे गूत। मिनु आ कुल नाक्वत डा नां खोदेशो पा कोव्रने मचाप्चा डा तांइसाक्व। १७मिनु गोमी मेको मोदेशो तडानु, बेक्शो मुर खोदेब पा मेको आ खोइलीम गोल्टी। मिनु मेकोमी चहिं आ ग्युरा गुइ आं तारी वोइशशा “महिनो, गो नेल्ल क्येडा डोंइती नु नेल्ल क्येडा नोले डा नड। दानीएल ८:१८ १८ब्रोंइशा बाक्व नड। गो बेक्शा यो, लेशा मबेक्चा डा पा ब्रोंइती। मिनु नरक नु बेक्शा लशो मुर आन बाक्तीक डा रोक्तीक सांचो गो नु बाक्व। १९गे मार मार तवी, मेको ब्रेक्वतो। गे मार ब्रेक्चा माल्नेवे देंशा हना, मुल मार बाक्बा, नोले मार दुम्बा, मेको नेल्ल ब्रेक्वतो।

२०मिनु आं ग्युरा गुइमी बाक्शो ७ ओटा सोरुल नु ७ ओटा खपीम बाक्शो सुन के दियारी आ खुइशशो अर्थ मार बाक्ब देंशा हना, मेको आं गुइमी तशो ७ ओटा सोरुलपुकी मेको एसीया डा ७ ओटा सहर डा थमा सुइक्व आन गुम्तीके डा शेंब नम। मेको ७ ओटा दियारी चहिं मेको एसीया डा ७ ओटा सहर डा थमा सुइक्व आन गुम्तीके डा मुर नम” दे माइक्ती।

### एफिसस कली चिठी

२ मिनु येसु ख्रीस्तमी आं कली एफिसस सहर डा थमा सुइक्व आन शेंब कली ब्रेक्पाइक्ती। एको आ ग्युरा गुइमी ७ ओटा सोरुल नु ७ ओटा सुन के दियारी आन दातेमी हिरब आ लोव्र बाक्ब। प्रेरित १८:१६ २मेकोमी “गो इन पशो गेय, इन फाल्शो श्येत नेल्ल तुइक्नुड। मिनु गे मरिम्शो मुर आन कली फाल्ने मचाप्नीनी। मिनु गे सोइशशो, आं लोव्र शेंब दुम्खु पाइब मुर आन कली नाक्शा, जोल्फे बाक्नीम, दे तुइक्नीनी। १यूहन्ना ४:१ ३गे फाल्शा, आं कली थमा सुइक्तीनी। मोपा थमा सुइक्चा मदथु, आं पर्वम श्येत फाल्नीनी, दे गो तुइक्नुड। १तिमोथी ५:१२ ४तन्न गो इन कली लोव्र का पचा माल्नुड। मार लोव्र पचा माल्नुड देंशा हना, डोंइती गे आं कली थमा पा दाक्ताक्नी। मुल चहिं डोंइती डा खोदेशो पा दाक्चा प्रोंइतीनी। ५इन डोंइती डा आं कली दाक्शो मिम्तीने। इन थुं आं गे लेत्तीने। मिनु इन डोंइती डा पशो गेय पने। गे मेको दाक्चा डा गेय मपाइतीनी हना, गो इन बाक्तीके जाक्शा, इन दियारी आ बाक्तीके रे तिल्नुड। ६तन्न इन गेय का रिम्शो बाक्ब। गेपुकी निकोलाइटन



आन शेंतीके डा गेय ग्रांग्रा दीनीनी। गो यो ग्रांग्रा दीनुड। भजन संग्रह १३६:२१ ७ परमप्रभु यावे आ सोक्तीमी थमा सुइक्ब मुर आन कली शेंशो लोत्र सु सुमी नेंने चाप्नीमी, मेकोमी नेन्मेक्ल। सु सुमी सैतान कली ग्रानीमी, मेको आन कली परमप्रभु यावे आ रूमी बाक्ब ब्रोंडतीक रवा आ फल व्वचा गेनुड” दे ब्रेक्पाइक्ती। प्रकाश २२:२; उत्पत्ती २:६

### स्मिरना कली चिठी

८ मिनु येसु ख्रीस्तमी आं कली स्मिरना सहर डा थमा सुइक्ब आन शेंब कली ब्रेक्पाइक्ती। मेकोमी “गो नेल्ल क्येडा डोंडती नु नेल्ल क्येडा नोले नड। गो बेक्शा यो ब्रोंडती” देंत। प्रकाश १:११;

प्रकाश १:१८ ६ मेकोमी “गो इन श्येत जशो तुइक्नुड। गे थमा पा प्रुडग बाक्नीनी, दे गो तुइक्नुड। तन्न गे इन थुंम शोंप पाइशो बाक्नीनी, दे यो तुइक्नुड। मरिम्शो लोत्र पाइब सु सु नमी देंशा हना ‘यहूदी नकी’ देंखु पाइबपुकी सैतानमी शेंशो मुर नम। याकूब २:५; प्रकाश ३:६ १० मिनु मुल इन कली श्येत दुम्चाप्टु। तन्न महिनीने। नेनीन, मुल दियाबलस सैतानमी गे का निक्शी इन कली थुं थाम्चा कली जेल्खानम चोक्पाइक्ब। गे १० नाक्त सम्म ला श्येत जाइनीनी। साइक्चाम्तेक्म हना यो, फाल्शा थमा सुइक्चा मप्रोनीन। मो पाइतीनी हना, गो इन कली गेना हना यो ब्रोंडशा बाक्तीक सिरपेच गेनुड। मती १०:१६, २८; प्रकाश ३:११;

२तिमोथी ४:८ ११ परमप्रभु यावे आ सोकतीमी थमा सुइक्ब मुर आन कली शेंशो लोव्र सु सुमी नेंने चाप्नीमी, मेकोमी नेन्मेक्ल। सु सुमी सैतान कली ग्रानीमी, मेको निक्शी खेयप बेक्चा ममाल्नीम। मिनु परमप्रभु यावेमी गेशो सजाइ यो मताइनीम” दे ब्रेक्पाइक्ती। प्रकाश २०:१४

### पेरगामोम कली चिठी

१२ मिनु येसु ख्रीस्तमी आं कली पेरगामोम सहर डा थमा सुइक्ब आन शेंब कली ब्रेक्पाइक्ती। आ शोव्र रे निम्फा गे क्योरतीक पाइश्शो हेश्शो तरवार पाइश्शोमी १३ “इन बाक्तीक सहरम सैतान आ नित्तीके बाक्ब, दे गो तुइक्नुड। गेपुकीमी ‘गो येसु ख्रीस्त आ मुर नकी’ दे आं कली थमा सुइक्चा मप्रोंइनी। मिनु इन सहरम सैतान आ नित्तीके बाक्मेनु, अन्टीपास माइश्शो आं कली मप्रोंइथु, थमा सुइक्ब नु आं लोव्र शेंब बाक्त। मिनु मुरुमी मेको कली सैतान आ बाक्तीकेमी बाक्शा, साइक्तेक्म हना यो, गे आं कली थमा सुइक्चा मप्रोंइनी। १४ तन्न गो इन कली लोव्र का पचा माल्नुड। मार लोव्र पचा माल्नुड देंशो हना, गे का निक्शीमी मरिम्शो गेय पाइतीनी। इन ग्रुम्तीके डा का निक्शीमी बालाम माइश्शो मुर आ शेंशो थमा सुइक्नीमी। बालाममी मार शेंताक्व देंशा हना, डोंइती बालाक माइश्शो पिप कली इस्राएल जात डा वोंइश मुर आन कली खतम सेल्लु। दोपा खतम सेल्लु देंशा हना, चदेशो थोव्रक ब्वपाइक्तु। मिनु तेल्लेम पपाइक्तु। गन्ती ३१:१६; २पत्रुस २:१५; यहूदा:११ १५ मिनु गे इन ग्रुम्तीकेमी निकोलाइटन आन शेंशो लोव्र का निक्शीमी थमा

सुइक्नीमी। १६ मोपतीके इन थुं गो आं गे लेत्तीन। मलेत्ताक्नी हना, गो इन ग्रुम्तीकेमी रीब पा जाक्नुड। मिनु आं शोव्र डा तरवारमी मेको नु लडाइ पाइनुड। १७ परमप्रभु यावे आ सोकतीमी थमा सुइक्ब मुर आन कली शेंशो लोव्र सु सुमी नेंने चाप्नीमी, मेकोमी नेन्मेक्ल। मिनु सु सुमी सैतान कली ग्रानीमी, मेको आन कली खुइश्शा वोइश्शो मन्ना शोब्ले गेनुड। मिनु गोमी मेको ग्राब आन कली बुश हीरा का का गेनुड। मेको बुश हीरा तार हीरा ताइब आन नक नें ब्रेक्शो बाक्ब। मेको नें हीरा ताइबमी ला तुइक्नीम। अर्को मुरुमी चहिं मतुइक्नीम” दे ब्रेक्पाइक्ती। भजन संग्रह ७८:२४; यसैया ६२:२

### थिआटीरा कली चिठी

१८ मिनु परमप्रभु यावे आ तौमी आं कली थिआटीरा सहर डा थमा सुइक्ब आन शेंब कली ब्रेक्पाइक्ती। एको आ मिक्च हुरुर पा ब्रशो मी खोदेंशो तांइसीशो नु आ खोइली याप्पाइश्शो टल्केशो कांसा खोदेंशो तांइसीशो आ लोव्र बाक्ब। प्रेरित १६:१४; प्रकाश १:१४-१५ १६ मेकोमी “गो इन पशो गेय तुइक्नुड। इन आं कली दाक्शो, इन थमा सुइश्शो, इन थमा सुइक्ब आन कली पशो गेय नु इन श्येत फाल्शो तुइक्नुड। गे डोंइती क्येडा शुश गेय पाइनीनी। २० तन्न इन कली लोव्र का पचा माल्नुड। मार लोव्र पचा माल्नुड देंशा हना, गे इजेबेल माइश्शो मीश मुर कली इन ग्रुम्तीकेमी बाक्चा गेतीनी। इजेबेलमी ‘गो परमप्रभु यावेमी तुइक्पाइश्शो लोव्र पाइब नड’ देंखु पा, आं गेय पाइब आन कली मरिम्शो पचा शेंताक्मी। मार मरिम्शो पचा शेंताक्मी देंशा हना, तेल्लेम पचा नु

मूर्ति कली चढ़ेशो थोत्रक जचा ब्वचा दुम्ब, दे शेंताकमी। २१ राजा ६:२२ २१ गोमी मेको कली 'इ थुं आं गे लेत्तो। इ तेल्लेम पचा ताइक्तो' दे रिम्ताकड। मेकोमी आ थुं गो आं गे लेत्चा नु आ तेल्लेम पचा ताइक्ने मबीस। २२ मिनु गो मेको कली रोइ पपाइक्नुड। मिनु मेको नु तेल्लेम पाइब आन तेल्लेम पचा प्रोंइशा, गो आं गे लेत्ने मबिस्साकम हना, मेको आन कली यो ठेयब श्येत गेनुडमी। २३ आ आल आन कली मुर साइक्ब रोइम साइक्नुडमी। मेको आन श्येत जशा, बेक्शो तशा 'गोम पाप्तु' दे थमा सुइक्ब नेल्लेमी तुइक्नीमी। मिनु थमा सुइक्ब आन ग्रुम्तीके डा मुर नेल्लेमी 'येसु ख्रीस्तमी मुर आन थुं नु आन पशो तुइक्ब। मिनु नोले दोपा पामे, मोपा गेब' दे तुइक्नीम। भजन संग्रह ७:१०; येरमीया १७:१० २४ तन्न थिआटीरा डा थमा सुइक्ब आन ग्रुम्तीकेमी इजेबेल आ शेंशो मपाइबपुकी यो बाक्नीम। मेकोपुकीमी इजेबेल आ शेंसीब बुदी सैतान आ ठेयब गेय यो मतुइक्नीम। मिनु आं कली रिम्शो पा थमा सुइक्ब आन कली अर्को श्येत मगेनुड। २५ गे इन तुइशो गो मजाकडा सम्म पना पन बाक्कीन। प्रकाश ३:११ २६ सु सुमी सैतान कली ग्रानीमी, मेकोमी बेक्ची ना सम्म आं गेय पाइनीमी, गो मेको आन कली रागी रागी डा मुर आन कली सासन पतीके सक्ति गेनुड। २७ मिनु मेकोपुकीमी खप के ग्योब आन कली फलाम के कोक्केमी चोंइटा चोंइटा पशो बुद पा रागी डा मुर आन कली सासन पाइनीम। गो यो मोदेशो सक्ति आं आफ रे तशो नड। भजन संग्रह २:८-९ २८ मिनु गोमी मेको सैतान कली ग्राब आन कली सुनी डा सुक्कुर सोरुल गेनुड। २९ परमप्रभु यावे

आ सोक्तीमी थमा सुइक्ब मुर आन कली शेंशो लोत्र सु सुमी नेंने चाप्नीमी, मेकोमी नेन्मेक्ल" दे ब्रेक्पाइक्ती।

### सारडीस कली चिठी

३ मिनु येसु ख्रीस्तमी आं कली सारडीस सहर डा थमा सुइक्ब आन शेंब कली ब्रेक्पाइक्ती। एको ७ ओटा ठाउं डा परमप्रभु यावे आ सोक्त नु ७ ओटा सोरुल नु बाक्ब आ लोत्र बाक्ब। मेकोमी "गो इन पशो गेय तुइक्नुड। गेपुकीमी चहिं 'गो ख्रीस्त कली थमा सुइशशा, ब्रोंइशा बाक्नीकी' देंनीनी। तन्न इन थमा सुइक्तीके बेक्शो खोदेंब पा इप्शो बाक्ब। प्रकाश १:४ २ मोपतीके सेंशा बोक्कीन। इन बेक्चा चिक्शो थमा सुइक्तीके बारपतीन। गोमी इन गेय ताता। मेको इन गेय आं परमप्रभु यावे कली मगारनीम। लूका २२:३२ ३ मिनु इन तशो नु इन नेंशो मिम्तीन। मेको कली मप्रेंथु, इन थुं गो आं गे लेत्तीन। गे मो मपाइतीनी हना, गो खुइ खोदेशो पा इन बाक्तीकेमी जाक्नुड। मिनु गो गेना जाक्नुडा, गे मतुइक्नीनी। १ थिस्सलोनिकी ५:२ ४ मिनु सारडीस सहर डा थमा सुइक्ब आन ग्रुम्तीकेमी का निक्शी रिम्शो पा थमा सुइक्ब यो बाक्नीम। मेकोपुकीमी पाप मपाम, मोपा आन वा मलुम्सीशो बाक्ब। मारदे हना मेको आन नाक्त किंत डा गेय परमप्रभु यावे कली गारब। मोपतीके मेकोपुकी गो नु बुश वा फेक्शा, हिरचा शिरनीम। यहूदा :२३ ५ सु सुमी सैतान कली ग्रानीमी, मेको आन कली मोपा बुश वा फेक्चा गेनुड। मिनु मेको आन नें परमप्रभु यावे नु ब्रोंइचा ताइब आन नें ब्रेक्शो किताब रे मक्याम्नुड। गोमी

आं आफ नु आ स्वर्ग डा गेय पाइब आन डोंइती 'मेको आं मुर नम' देंनुड।  
 प्रकाश ७:१३; लूका १०:२०; मत्ती १०:३२ ६ परमप्रभु यावे आ सोक्तीमी थमा सुइक्ब आन कली शेंशो लोव्र सु सुम नेंने चाप्नीमी, मेकोमी नेन्मेक्ल" दे ब्रेक्पाइक्ती।

### फिलाडेल्फीया कली चिठी

७ मिनु येसु ख्रीस्तमी आं कली फिलाडेल्फीया सहर डा थमा सुइक्ब आन शेंब कली ब्रेक्पाइक्ती। मेको परमप्रभु यावे आ तौ, थमा पा पाप रे प्रोंइब, दाऊद आ राज्य डा सांचो थीबमी लापचो रोक्गा डा मेरे सुइमी चोक्ने मचाप्नीम। मिनु चोक्गा डा मेरे सुइमी रोक्ने मचाप्नीमी। यसैया २२:२२ ८ मेकोमी "गो इन पशो गेय तुइक्नुड। गे इन सक्ति आइक्च बाक्त हना यो, आं देशो टीतीनी। मिनु गेपुकीमी 'येसु ख्रीस्त कली मतुइक्नुड' दे गेनायो मदेनी। मोपतीके गो इन कली लापचो रोक्शा वोइक्ता। मेको सुइमी चोक्ने मचाप्नीम। ९ मिनु इन गुम्तीकेमी का निक्शीमी 'यहूदी नकी' दे जोल पाइनीम। मेकोपुकी चहिं सैतान आ शेंशो मुर बाक्नीम। नेनीन, गो मेको आन कली इन खोइलीमी बाप्शा सेउ पपाइक्नुड। गोमी इन कली दाक्नुड, दे मेको आन कली तुइक्पाइक्नुड। प्रकाश २:६; यसैया ४६:२३; यसैया ६०:१४ १० मिनु गे शुश श्येत फाल्शा, आं देशो लोव्र मप्रोंइनी। मोपतीके रागी नेल्ल डा मुर आन थुं थाम्चा कली जाक्शो श्येत रे प्रोंइनन्नी। प्रकाश १४:१२; मत्ती ६:१३ ११ मिनु गो फ्रा लेशशा यीनुड। थमा सुइक्चा मप्रोनीन। मोपा बाक्तीनी हना, सुइमी इन सिरपेच रोइक्ने मचाप्नीम। प्रकाश २:१० १२ सु सुमी

सैतान कली ग्रानीमी, गोमी मेको आन कली आं परमप्रभु यावे आ खिं डा थाम खोदेशो बोल्यो सेल्लुड। मिनु मेको गेना हना यो परमप्रभु यावे आ खिंमी बाक्नीम। मिनु मेको मुर आन तारी आं परमप्रभु यावे आ नें, आं परमप्रभु यावे आ सहर आ नें नु आं नक नें ब्रेक्नुड। आं परमप्रभु यावे आ सहर चहिं नक यरूसलेम माइश्शो बाक्ब। मेको नक यरूसलेम आं परमप्रभु यावे आ बाक्तीक स्वर्ग रे यीब। प्रकाश १४:१; प्रकाश २१:२ १३ परमप्रभु यावे आ सोक्तीमी थमा सुइक्ब आन कली शेंशो लोव्र सु सुमी नेंने चाप्नीमी, मेकोमी नेन्मेक्ल" दे ब्रेक्पाइक्ती।

### लाओडीसीया कली चिठी

१४ मिनु येसु ख्रीस्तमी आं कली लाओडीसीया सहर डा थमा सुइक्ब आन शेंब कली ब्रेक्पाइक्ती। एको आमैन माइश्शो, दीगो पाइब परमप्रभु यावे आ सांकछी नु रागी नु मारेइ मारेइ सेल्ल आ लोव्र बाक्ब। कलस्सी २:१; कलस्सी ४:१३; २कोरिन्थी १:२०; प्रकाश १:५; कलस्सी १:१५ १५ मेकोमी "गो इन पशो गेय तुइक्नुड। इन थमा सुइक्चा सिक्स यो ममाइ, होश यो ममाइ, कि सिक्स कि होश दुम्शो हना, रिम्शो दुम वा। १६ तन्न इन थमा सुइक्तीके गाम्चा चिक्शो बाक्ब। मोपतीके गो इन कली तेशा ताइक्नुड। १७ मिनु गेपुकीमी 'आंइ के शुश शॉप बाक्ब। गो शॉप पाइश्शो नकी। गो मारेइ ममाल्नीकी' देंनीनी। तन्न गो इन कली श्येत जाइब नु पुडग, मिक्च मताइब नु हेरा शिशा गाक्शा पुंडब खोदेशो दुम्शो ताता। १कोरिन्थी ३:१८; १कोरिन्थी ४:८ १८ मोपतीके गो इन कली लोव्र का पाइनुड, मार लोव्र पाइनुड

देशा हना, गे शोप पाइशो दुम्चा कली आं सुन ग्यापीन। मेको सुन याप्पाइशो बाक्ब। मेको ग्याप्तीनी हना, गे शोप पाइशो दुम्नीनी। मिनु फेक्चा कली बुश वा ग्यापीन। मेको ग्याप्तीनी हना, मुने मदोक्नीनी। मिनु इन मिक्च, सापाइक्चा कली मिक्चीम खेक्तीके ग्यापीन। ग्याप्शा खेक्साक्नी हना, गे ताइनीनी। १६गो आं दाक्शो मुर आन कली आन मरिम्शो पतीके कोइनुड। नोले गो मेको आन कली श्येत गेशा, आल खोदेशो पा शेनुड। इन थुं गो आं गे लेत्तीन। इन थमा सुइक्तीके बारपतीन। *हितोपदेश ३:१२; १कोरिन्थी ११:३२; हिव्रू १२:६* २०नेनीन, गो लाडगाम जाक्शा 'बाक्नी?' दे ब्रेत्नुड। सु सुमी आं सेंदा नेंशा 'ओव्रडीन' देंनीमी, गो मेको नु बाक्थ ओव्रनुड। मिनु मेको नु काथा बाक्शा, खमे जाइनुड। *यूहन्ना १४:२३* २१सु सुमी सैतान कली ग्रानीमी, मेको आन कली आं ठेयब नित्तीकेमी निप्पाइक्नुड। गो डोंइती ग्राती। मोपा गो आं आफ आ ठेयब नित्तीकेमी आफ नु निस्साक्यी। *मती १६:२८* २२परमप्रभु यावे आ सोक्तीमी थमा सुइक्ब आन कली शेंशो लोव्र सु सुमी नेंने चाप्नीमी, मेकोमी नेन्मेक्ल" दे ब्रेक्पाइक्ती।

### परमप्रभु कली पशो कुम्सो

४ मिनु नोले सरीड गे कोव्रता। मिनु मेकेर लाप्चो का रोक्शा वोइशो ताता। मिनु डोंइती आं नेंशो तुराही ताप्शो खोदेशो ठेयब सेंदा लेंशा नेंता। मेको सेंदामी "एक कुवो। नोले मार दुम्बा, गो इ कली कोंइनन" दे माइक्ती। *प्रकाश १:१०* २मिनु गो परमप्रभु यावे आ सोक्तीमी ब्रीती। स्वर्गमी ठेयब नित्तीके वोइशो ताता।

मेको ठेयब नित्तीकेमी का निश्शो ताता। *भजन संग्रह ४७:६; यसेया ६:१; इजीकीएल १:२६-२८* ३मेको ठेयब नित्तीके बुश नु लल टल्केशो हीरा खोदेशो तांडसाक्ब। मेको ठेयब नित्तीके आ एर ओथ वाक्श दाप्शो ताता। मेको वाक्श गिग हीरा खोदेशो तांडसाक्ब। ४मिनु ठेयब नित्तीके आ एर ओथ २४ ओटा आइक्च नित्तीकपुकी बाक्तेक्म। मेको नित्तीकपुकीमी बुश वा फेक्शो नु आन पियामी सुन के सिरपेच गुप्शो २४ जना शेंब खाल्पा निश्शो बाक्तेक्म। *प्रस्थान १६:१६; प्रकाश १:४* ५मिनु मेको नित्तीक रे चिला दाप्शो तांडसाक्ब। मिनु बुंबु पशो रेयके नु सेंदापुकी नेंसाक्ब। मिनु ठेयब नित्तीक आ डोंइती ७ ओटा ब्रशो तोव्रशी बाक्तेक्म। मेको ७ ओटा तोव्रशी चहिं परमप्रभु यावे आ ७ ठाउंम बाक्शो सोक्त बाक्तेक्म। *प्रस्थान १६:१६* ६मिनु नित्तीक आ डोंइती समुन्द्र खोदेशो दिंम का बाक्त। मेको दिंम सिसा खोदेब टल्केशो तांडसाक्ब। मिनु मेको ठेयब नित्तीके आ एर ओथ आन रां नेल्ले शुश मिक्च पाइशो ४ ओटा सेस जन्तु बाक्तेक्म। *इजीकीएल १:५, १०, २२* ७मेको सेस जन्तुपुकी दोदेब तांडसाक्म देशा हना, डोंइती डा जन्तु गुप्स खोदेशो तांडसाक्ब, अर्को सेस जन्तु बोहोर खोदेशो तांडसाक्ब। नोले डा सेस जन्तु आ कुल मुर के खोदेशो तांडसाक्ब। मिनु नेल्ल क्येडा नोले डा सेस जन्तु बेरशो ककाकुली खोदेशो तांडसाक्ब। *इजीकीएल १०:१४* ८मिनु मेको सेस जन्तु ६, ६ ओटा फ्रां पाइशो बाक्तेक्मे। मेको आन फ्रां नेल्ल नु आन रां नेल्लेमी मिक्च पाइशो बाक्तेक्म। मिनु मेकोपुकी नाक्दो नाक्त परमप्रभु यावे कली कुम्सो पना पन बाक्बाक्तेक्म। मार



कुम्सो पाइबाक्तेक्म देशा हना, “परमप्रभु यावे, गे का ला परमप्रभु ननी। गे नेल्ल सक्ति पाइश्शो बाक्नीनी। गे डोंइती बाक्शो बाक्तीनी। मुल यो बाक्नीनी। मिनु नोले यो जाक्नीनी” दे कुम्सो पना पन बाक्बाक्तेक्म। *यसैया ६:२-३; प्रस्थान ३:१४*  
 ६मोपा मेको ४ ओटा सेस जन्तुम गेना हना यो ब्रोंइशा बाक्ब ठेयब नित्तीकेमी निप्ब कली “गे छेडछेड, मान ताइब नु रिम्शो पाइब बाक्नीनी” देंमानु, १०मेको २४ जना शेंब खाल्पामी मेको ठेयब नित्तीकेमी निप्ब आ डोंइती आन पोक्च थेक्शा सेउ पाम्तेक्म। मिनु गेना हना यो ब्रोंइशा बाक्ब कली मान पाम्तेक्म। मिनु मेकोपुकीमी आन सिरपेच पुइश्शा, मेको ठेयब नित्तीकेमी निप्ब आ डोंइती वोइश्शा ११“गे प्रभु, आंइ परमप्रभु यावे ननी। गे सक्ति पाइश्शा, छेडछेडम बाक्शा, मान ताइब बाक्नीनी। मारदे हना गे मारेइ मारेइ सेल्लतीनी, मोपा इन दाक्शा सेल्लो मुल सम्म बाक्ब” दे कुम्सो पना पन बाक्तेक्म।

### छाप थोक्शो कागज

**५** मिनु गो मेको ठेयब नित्तीकेमी निप्ब आ ग्युरा गुइमी ओल्शो कागज का शेशो ताता। मेको कागजम निम्फा गे ब्रेक्शो बाक्त। मिनु मेको कागज ७ ओटा छाप थोक्शा, प्राक्ने मचाप्चा डा सेल्लो बाक्त। *प्रकाश ४:३; इजीकीएल २:१-१०*  
 २मिनु गो सक्ति पाइश्शो परमप्रभु यावे आ स्वर्ग डा गेय पाइब का ताता। मेकोमी ठेयब सेंदामी “सुमी मेको ७ ओटा छाप पुइश्शा, कागज प्राक्ने चाप्बा?” दे हिल्लो पाप्तु।  
 ३मिनु स्वर्गमी, रागीमी नु रागी आगाम बाक्बपुकीमी सुइमी मेको कागज प्राक्ने मचबेम, कोवने यो मचबेम। ४मोपतीके

गो शुश डाक्ती। मारदे हना सुइमी मेको कागज प्राक्ने मचबेम, कोवने यो मचबेम। ५मिनु मेको शेंब खाल्पा कामी आं कली “मडाक्को। मेको गुप्स, यहूदा आ थर डा पिप दाऊद आ खिं डा बाक्ब। मेकोमी सैतान कली ग्रात। मोपा मेको कागज डा ७ ओटा छाप पुइश्शा प्राक्ने चाप्ब” देंत।  
*उत्पत्ती ४६:६-१०; यसैया ११:१*

### पाठा कली नक कुम्सो पशो

६मिनु गोमी ठेयब नित्तीके, ४ ओटा सेस जन्तु नु शेंब खाल्पा आन दातेमी क्योरशो पाठा खोदेशो पा दोक राप्शो ताता। मेको पाठा के ७ ओटा ग्रोव नु ७ ओटा मिक्च बाक्त। मेको मिक्च चहिं परमप्रभु यावेमी रागी रागीमी सोइश्शो परमप्रभु यावे आ ७ ओटा सोक्त बाक्तेक्म।  
*यसैया ५३:७; यहूना १:२६*  
 ७मिनु मेको पाठामी मेको ठेयब नित्तीकेम निप्ब आ ग्युरा गुइ रे मेको कागज ताक्तु। ८मोपा ताक्गानु, सेस जन्तु नु शेंब खाल्पापुकी पाठा आ डोंइती पोक्च थेक्शा बाप्तेक्म। मेकोपुकीमी ठेयब ताप्तीके नु सुन के थनौरो कुरशो बाक्तेक्म। मिनु सुन के थनौरो चहिं धूपमी ब्रीशो बाक्तेक्म। मेको धूपमी ब्रीशो थनौरो चहिं थमा सुइक्ब मुर आन मान पशो नु पुंइशो लोव बाक्तेक्म। ९मिनु मेकोपुकीमी पाठा कली नक कुम्सो का पाम्तेक्म। मार नक कुम्सो पाम्तेक्म देशा हना “मेको कागज ताक्ने नु प्राक्ने चाप्ब, गे का ला ननी। मारदे हना गे मुर आन कली परमप्रभु यावे आ नेक्था बाक्पाइक्चा कली ग्याप्तीनी। दोपा ग्याप्तीनी देशा हना, साइक्चा पुंइसीशा, इन हुश शाइश्शा ग्याप्तीनी। मिनु गे मार मुर ग्याप्तीनी देशा हना, नेल्ल थर रे, नेल्ले लोव रे, नेल्ल

जात रे नु नेल्ल रागी रे मुरपुकी ग्याप्तीनी।  
भजन संग्रह ३३:३ १०मिनु गे मेको आन कली  
परमप्रभु यावे आ राज्य डा पिप नु आ  
डोंडती राप्ब सेलतीनी। मिनु रागी नेल्ल  
कली सासन पाइब यो सेलतीनी” दे कुम्सो  
पाम्तेक्म। प्रकाश १:६; प्रस्थान १६:६

### पाठा कली मान पशो

११मिनु मेको ठेयब नित्तीके गे कोव्रना  
कोव्रन बाकडानु, सेस जन्तु नु शेंब खाल्पा  
आन एर ओंथ शुश परमप्रभु यावे आ  
स्वर्ग डा गेय पाइब आन सेंदा नेता। मिनु  
मेकोपुकी गिश बाक्तेक्म देंशा हना, हजार  
हजार, लाख लाख बाक्तेक्म। हिब्रू १२:२२  
१२मिनु मेकोपुकीमी “मेको साइक्चा  
पुंडसीशो पाठा का ला सक्ति पाइशो,  
शोंप पाइशो, जोक्तीक तुइक्तीक, बोल,  
मान, छेडछेड नु रिम्शो पाइब बाक्नीनी  
देंचा शिरशो बाक्ब” दे ठेयब सेंदामी  
देंतेक्म। १इतिहास २६:११; फिलिप्पी २:६-१०

### शुश मरुम मान पशो

१३मिनु स्वर्गमी बाक्ब, रागी नु रागी  
आगाम बाक्ब, समुन्द्र तारी नु आगाम  
बाक्ब नेल्लेमी “गेना हना यो ठेयब  
नित्तीकेमी निप्ब नु पाठा कली गे  
रिम्शो पाइब बाक्नीनी, मान, छेडछेड  
ताइब नु सासन पाइब बाक्नीनी”  
देंशो नेता। १४मिनु मेको ४ ओटा सेस  
जन्तुमी “आमेन” देंतेक्म। मिनु मेको  
खाल्पापुकीमी बाप्शा सेउ पाम्तेक्म।

### पाठामी छाप प्राक्शो

६ मिनु मेको पाठामी मेको कागज रे  
७ ओटा छाप रे का प्राक्शो ताता।  
मिनु सेस जन्तु कामी बुंबु पशो खोदेंशो

पा “पिवो” दे ब्रेशशो नेता। २मिनु गो बुश  
शारा का ताता। मेको शारा डोइक्बमी  
लिब्रा कुरशो बाक्त। मेको कली सिरपेच  
गेशो बाक्त। मिनु मेको ग्राना ग्रान गाक्त।  
जकरिया ६:१-८

३मिनु पाठामी मेको लीशो ६ ओटा  
छाप रे का प्राक्गानु, अर्को सेस जन्तुमी  
“पिवो” दे ब्रेशशो नेता। ४मिनु गो अर्को  
शारा का ताता। मेको शारा चहिं शुश लल  
बाक्त। मिनु शारा डोइक्ब कली रागी डा  
मुर आन दुशा बाक्तीके नेल्ल रोइक्चा  
कली नु मुर क्योरमुपाइक्चा कली ठेयब  
चुक्ब गेशो बाक्त।

५मिनु पाठामी मेको लीशो ५ ओटा  
छाप रे का प्राक्गानु, अर्को सेस जन्तुमी  
“पिवो” दे ब्रेशशो नेता। मिनु गो क्येर शारा  
का ताता। मेको शारा डोइक्बमी तुला  
का ग्याइशो बाक्त। ६मिनु गो मेको ४  
ओटा सेस जन्तु आन दातेमी सेंदा कामी  
“काबु डा गेय कली माना निक्शी चेरब  
फस गाल्च माल्ताक्व। मिनु काबु डा  
गेय कली माना सां क्योव्रज फस गाल्च  
माल्ताक्व। तेल नु अडगुर शांबु कली  
चहिं मारेइ मपचा” देंशो नेता।

७मिनु पाठामी ४ ओटा लीशो छाप  
रे का प्राक्गानु, नोले डा सेस जन्तुमी  
“पिवो” देंशो नेता। ८मिनु गो हौ शारा  
का ताता। मिनु मेको शारा डोइक्ब आ  
नें चहिं साइक्पाइक्ब नु बेक्पाइक्ब  
बाक्त। मिनु रागी डा बेक्शो मुरपुकीमी  
मेको आ नोले खोइक्तेक्म। मिनु मेको  
कली रागी डा ४ भाग डा भाग का मुर  
आन कली साइक्पाइक्चा, दे अधिकार  
गेशो बाक्त। दोपा साइक्पाइक्चा गेशो  
बाक्त देंशा हना, कोइ आन कली  
तरवारम साइक्पाइक्चा, कोइ आन कली

अन्कालम बेक्पाइक्चा, कोइ आन कली मुर साइक्ब रोइ पा बेक्पाइक्चा नु कोइ आन कली जन्तुमी साइक्पाइक्चा, दे अधिकार गेशो बाक्त। *इजीकीएल १४:२१*

६मिनु पाठामी मेको लीशो छाप सां रे का प्राक्गानु, गो चढेतीके आगाम शुश मुर आन कली ताता। मेकोपुकी परमप्रभु यावे आ लोत्र टिचा कली नु अर्को आन कली येसु ख्रीस्त परमप्रभु यावे आ तौ बाक्ब, दे शेंचा आ पर्बम साइक्चा पुंडसीशो मुर बाक्तेक्म। १०मिनु मेकोपुकीमी ठेयब सेंदामी “परमप्रभु, गे का ला परमप्रभु नु थमा पा नेल्ल आन कली सासन पाइब बाक्नीनी। गेना आंइ कली साइक्ब आन कली निसाफ पाइनीनी? गेना रागीम बाक्ब आन कली क्येक्क लेत्नीनी?” देंतेक्म। ११मिनु परमप्रभु यावे आ स्वर्ग डा गेय पाइबमी मेको आन कली बुश वा का का फेक्चा कली गेप्तु। मिनु मेकोमी मेको आन कली “इच्का रिम्दीन, अर्को इन खोदेशो पा येसु आ गेय पाइब नु अर्को थमा सुइक्ब लोकब इन बुदी साइक्चा पुंडसीमा सम्म रिम्दीन” देंत।

१२मिनु पाठामी मेको लीशो छाप निक्शी रे का प्राक्गानु, ठेयब खिनु कुत। मिनु नां कुंखी खोदेशो क्येर दुम्त। तास्ला चहिं हुश खोदेशो लल दुम्त। *यसैया २४:२१-२३; योएल ३:३-४; मत्ती २४:२६* १३मिनु ठेयब फशेमी फोत्रशी आ ममीशो गेडा तोक्शो खोदेब पा सरीड डा सोरुलपुकी रागीमी दोक्तेक्म। १४मिनु सरीड ओल्शो कागज खोदेशो पा लाक्तु। डांडा, टापु नेल्ल याक्साक्म।

*यसैया ३४:४* १५मेना रागी डा पिपपुकी नु ठेयब मुरपुकी, फौज डा कप्तानपुकी, शोंप पाइश्शो नु बोल्यो मुरपुकी, वाइलीम वाइल नु मुर नेल्ल पहाड डा सेरथे फुल्लु

नु पुक्खीमी खुंडसाक्म। *यसैया २:१०,१६* १६मिनु पहाड नु सेरथे फुल्लु कली “गो आंइ कली सुम्की। मेको ठेयब नित्तीकेमी निप्ब नु पाठा आस गाइक्चा रे आंइ कली खुइक्तीकी। *लुका २३:३०* १७मारदे हना मेको आस गाइक्ची नाक्त जाक्त। सुइ मेको आस डोंइती राप्ने मचाप्नीम” दे ठेयब सेंदामी ग्रीतेक्म। *आमोस ५:१८; रोमी २:५; मलाकी ३:२*

### इसाएली छाप थोक्शीशो

७ मिनु नोले गो ४ जना परमप्रभु यावे आ स्वर्ग डा गेय पाइबपुकी रागी डा ४ कुनामी राप्शो तातामी। मेकोपुकी रवा आ सफा काइ यो महिम्पाइक्चा, रागी नु समुन्द्रमी फश मपपाइक्चा कली राप्शो बाक्तेक्म। *दानीएल ७:२* २मिनु अर्को परमप्रभु यावे आ स्वर्ग डा गेय पाइब का नां दाप्तीके रे कुशो ताता। मिनु गेना हना यो ब्रोंइब परमप्रभु यावे आ छाप मेको नु बाक्शो बाक्त। मेकोमी रागी नु समुन्द्र बिग्रेचा कली अधिकार तशो ४ जना परमप्रभु यावे आ स्वर्ग डा गेय पाइब आन कली ठेयब सेंदामी ३ “गोपुकीमी आंइ परमप्रभु यावे आ वाइलीम वाइल आन कुप्फीमी छाप मथोक्शो सम्म रागी, समुन्द्र नु रवा आन कली मबिग्रेने” देंत। *प्रकाश ६:४; इजीकीएल ६:४,६* ४मिनु गिश मुरपुकी छाप थोक्चा पुंडसीशो बाक्तेक्म देशा हना, इसाएली आन १२ थर डा लाख का ४४ हजार मुर छाप थोक्चा पुंडसीशो बाक्तेक्म। मिनु इसाएली आन थर डा तेको तेको बाक्तेक्म देशा हना,

*प्रकाश १४:१,३*

५यहूदा आ थर रे १२ हजार, रूबेन आ थर रे १२ हजार,

गाद आ थर रे १२ हजार,  
 ६ आशेर आ थर रे १२ हजार,  
 नाप्ताली आ थर रे १२ हजार,  
 मनस्से आ थर रे १२ हजार,  
 ७ सिमियोन आ थर रे १२ हजार,  
 लेवी आ थर रे १२ हजार,  
 इस्साकार आ थर रे १२ हजार,  
 ८ जबूलून आ थर रे १२ हजार,  
 योसेफ आ थर रे १२ हजार नु  
 बेन्यामीन आ थर रे १२ हजार मुरपुकी  
 छाप थोकचा पंडुसीशो बाक्तेकम।

### अर्को रागी डा मुर

६ मिनु नोले हिकने मचाप्या डा पा रागी रागी नेल्ल डा, जात नेल्ल डा, थर नेल्ल डा मुर नेल्ल नु लोव्र नेल्ल डा मुर ठेयब नित्तीकेमी निप्ब नु पाठा आस डोंइती राप्शो तातामी। मेकोपुकीम बुश वा फेक्शो बाक्तेकम। मिनु आन गुइमी खजूर रवा आ राशी शेशो तातामी। १० मिनु मेकोपुकीमी परमप्रभु यावे नु पाठा आस कली “मेको ठेयब नित्तीकेमी निप्ब आंइ परमप्रभु यावे नु पाठामी ला पाप रे प्रॉइने चाप्नीस” दे ठेयब सेंदामी ग्रीतेकम। ११ मिनु परमप्रभु यावे आ स्वर्ग डा गेय पाइब नेल्ले, ठेयब नित्तीके, शेंब खाल्पा नु मेको ४ ओटा सेस जन्तु आन एर ओंथ बाक्तेकम। मिनु मेको नेल्लेमी ठेयब नित्तीकेमी निश्शो परमप्रभु यावे आ डोंइती खुम्की पा बाप्शा, परमप्रभु यावे कली मान पाम्तेकम। १२ मेकोपुकीमी “आमेन। नेल्ल आसीक गेचा नु छेडछेड, जोक्ब तुइक्ब थुं, रिम्शो पाइब, मान सक्ति नु सासन पतीके नेल्ल गेना हना यो आंइ परमप्रभु यावे केन बाक्ल। आमेन” दे नेल्लेमी दैतेकम।

१३ मिनु मेको शेंब खाल्पा कामी आ कली “मेको बुश वा फेक्शो मुरपुकी सु नमी? ते रे जाक्मा?” दे हिल्लो पती। १४ मिनु गोमी “हजुर, गो मतुइक्नुड, गे तुइक्नीनी” दैती। मिनु मेको खाल्पामी “मेकोपुकी ठेयब श्येत रे जाक्तेकम। मिनु मेको आन मरिम्शो पतीके लुम्सीशो वा पाठा आ हुशेमी मुरतीके बुश दुम्त।

मती २४:२१; प्रकाश १२:११

१५ मो दुम्तीके मेकोपुकी परमप्रभु यावे आ ठेयब नित्तीके आ डोंइती बाक्नीम। मिनु नाक्दो नाक्त परमप्रभु यावे आ खिंमी परमप्रभु यावे कली गेय पाइनीम। मिनु ठेयब नित्तीकेमी निप्बमी मेकोपुकी नु बाक्शा, मेको आन कली कोव्रब। १६ मुल मेकोपुकी लेंशा शोव्रलु मबेक्नीम। तूतू मदाक्नीम। नां नु अर्को रापमी मेको आन कली गेनायो मनाप्ब।

यसैया ४६:१०

१७ मारदे हना मेको ठेयब नित्तीके आ दातेमी बाक्शो पाठामी मेको आन कली कोव्रशा, गोठला पाइब। मिनु मेकोमी मेको आन कली ब्रोंइचा गेब ब्वाक्कु बुक्तीके कोंइब। मोपा परमप्रभु यावेमी मेको आन प्रेक्कु फिक्ब” दैत।

भजन संग्रह २३:२; प्रकाश २१:४; यसैया २५:८

### पाठामी नोले डा छाप प्राक्शो

८ मिनु पाठामी ७ ओटा छाप रे नेल्ल क्येडा नोले डा छाप प्राक्गानु, आधा घन्टा सम्म स्वर्गमी सिक्सी पा काइ रेयके मपाम। हबकुक् २:२० २ मिनु नोले गो ७ जना परमप्रभु यावे आ स्वर्ग डा गेय पाइबपुकी परमप्रभु यावे आ डोंइती राप्शो तातामी। मिनु मेकोपुकीमी तुराही का का ताक्तेकम। मती २४:३१

३मिनु अर्को परमप्रभु यावे आ गेय पाइब का जाक्शा, चढेतीक आ नेक्था राप्त। मेकोमी सुन के थनौरो कुरशो ताता। मिनु मेकोमी शुश धूप ताक्तु। मार पचा कली ताक्तु देशा हना, थमा सुइक्ब आन परमप्रभु यावे कली मान पशो नु पुंइशो लोत्र सुन के चढेतीकेमी ब्वाइक्चा कली ताक्तु। ४मिनु परमप्रभु यावे कली मान पा पुंइशो लोत्र नु मेको धूप आ कुन परमप्रभु यावे आ स्वर्ग डा गेय पाइब आ गुइ डा थनौरो रे परमप्रभु यावे आ डोंइती लत। ५मिनु नोले मेको परमप्रभु यावे आ स्वर्ग डा गेय पाइबमी धूप चढेतीके डा मी लाइश्शा, मेको थनौरोमी कुर पाप्तु। मिनु रागीमी ताइक्ताक्व। मिनु रागीमी बुंबु पाप्तु, शुश रेयके पाप्तु। चिला पा ख्रिनु कुत। इजीकीएल १०:२

### डोंइती डा ४ ओटा तुराही

६मिनु मेको ७ ओटा तुराही शेयब परमप्रभु यावे आ स्वर्ग डा गेय पाइबपुकीमी तुराही ताप्चा चिक्ताक्म। ७मिनु डोंइती डा तुराही शेयब परमप्रभु यावे आ स्वर्ग डा गेय पाइबमी ताप्तु। मोपा तबानु, सरीड रे रागी तारी हुश ब्वांइसीशो मुप्स नु मी यित। मिनु रागी के भाग सां डा भाग का, रवा आन भाग सां डा भाग का नु घांस नेल्ल दुप्शा नेक्तु। प्रस्थान ६:२३-२६

८मिनु लीशो ६ जना परमप्रभु यावे आ स्वर्ग डा गेय पाइब कामी तुराही ताप्तु। मोपा तबानु, ठेयब मी ब्रशो डांडा खोदेशो समुन्द्रमी ताइश्शो ताता। प्रस्थान ७:२०-२१ ६मिनु समुन्द्र के भाग सां डा भाग का हुश दुम्त। मेकेर बाक्ब जन्तु नु डांइपुकी भाग सां डा भाग का बेक्तेक्म। मिनु जाजपुकी भाग सां डा भाग का खतम दुम्तेक्म।

१०मिनु लीशो ५ जना परमप्रभु यावे आ स्वर्ग डा गेय पाइब कामी तुराही ताप्तु। मिनु सरीड रे मी ब्रशो रांको खोदेशो ठेयब सोरुल खोला इनार नु ब्वाक्कु बुक्तीके डा भाग सां डा भाग का तार दोक्त। यसेया १४:१२ ११मेको सोरुल आ नें कशो बाक्त। तेकेर मेको सोरुल दोक्मे, मेकेर डा ब्वाक्कु कशो दुम्त। मिनु शुश मुरपुकी मेको कशो दुम्शो ब्वाक्कु तूशा बेक्तेक्म।

१२मिनु लीशो ४ जना परमप्रभु यावे आ स्वर्ग डा गेय पाइब डा कामी तुराही ताप्तु। मिनु नां तास्ला नु सोरुल आन भाग सां डा भाग का खतम दुम्तेक्म। मोपा छेडछेड डा भाग सां डा भाग का छिडछिड दुम्त। नाक्त डा भाग सां डा भाग का यो छिडछिड दुम्त। मिनु नाक्दो डा भाग सां डा भाग का यो छिडछिड दुम्त। प्रकाश ६:१२; प्रस्थान १०:२१

१३मिनु नोले ककाकुली का सरीडमी बेरशो ताता। मेकोमी ठेयब सेंदामी “मुल परमप्रभु यावे आ स्वर्ग डा गेय पाइब सांमी तुराही ताप्चा लीतेक्म। मेको आन ताप्शो रेयकेमी रागी डा मुर आन कली थम हिंचा डा दुम्चाप्तु। आबी आबी आबी, तुराही ग्रीशोमी रागी डा मुरपुकी शुश श्येत जाइनीम” दे ग्रीशो नेंता।

### लीशो तुराही सां डा निक्शी

९ मिनु लीशो ३ जना परमप्रभु यावे आ स्वर्ग डा गेय पाइब कामी तुराही ताप्तु। मिनु गोमी सोरुल का सरीड रे दोक्शो ताता। मेको सोरुलमी ठेयब दुइश्शो, पुं मपाइश्शो ढोडोडगा डा लाप्चो रोक्तीके सांचो ताक्तु। २मिनु मेकोमी ठेयब दुइश्शो पुं मपाइश्शो ढोडोडगा डा लाप्चो रोक्गानु, कुन गूत।

मेको कुन ठेयब मी आ कुन खोदेब तांइसाक्व। मेको कुन गूमेनु, नां नु सरीड छिडछिड दुम्त। *योएल २:२, १०* ३मिनु मेको कुन रे माले खोदेशो रागीमी गूतेक्म। मेको आन सक्ति रागी डा बिच्छी आन के खोदेशो बाक्त। ४मिनु मेको आन कली “मेको रागी डा घांस नु रवा डा सफा मबिगेने, परमप्रभु यावे आ छाप कुष्फीमी मथोक्शो मुर आन कली ला श्येत गेने। *प्रकाश ७:३* ५मिनु मेको आन कली मसतीन, तन्न ५ महिना सम्म श्येत गेने” देशो नेता। मेको श्येत चहिं बिच्छीमी मुर आन कली क्राइशो खोदेशो बाक्व। ६मिनु मोदेशो दुम्मेनु, मुरपुकी बेक्चा दाक्नीम। तन्न बेक्ने मचाप्नीम। *प्रकाश ६:३६*

७मिनु मेको माले आन रां दोदेशो तांइसाक्म देशा हना, लडाइ पचा कली ठीक पा वोइशो शारा खोदेशो तांइसाक्म। मेकोपुकी सुन के सिरपेच खोदेशो गुप्शो बाक्तेक्म। ८मेको आन चां मीश मुर आन चां खोदेशो बाक्त। मेको आन खुइ गुप्स आन खुइ खोदेशो बाक्त। ९मेको आन कुचु डा फेक्तीके फलाम के खोदेशो बाक्त। मिनु मेको आन बेरशो रेयके चहिं शुश शारामी बग्गी कीशा, लडाइ पथ लशो रेयके खोदेशो नेंसाक्व। १०मेको आन मीलुमी बिच्छी के खोदेशो फूरो बाक्त। मेको आन श्येत गेतीके या बाक्त। मिनु मुर आन कली ५ महिना सम्म श्येत गेचा अधिकार तशो बाक्तेक्म। ११मेको आन के पिप का बाक्त। मेको पिप सु बाक्त देशा हना, दुइशो, पुं मपाइशो ढोडोडगा डा गेय पाइब बाक्त। मेको पिप आ नें हिबू लोत्रमी अब्बादोन नु ग्रीक लोत्रमी अपोल्लीयोन देंनीम। *मेको निम्फा आस अर्थ चहिं खतम पाइब बाक्व।* १२डोइती

डा हिंचा डा श्येत नुप्त। मिनु अर्को हिंचा डा श्येत निक्शी बाक्नीस।

१३मिनु लीशो निक्शी परमप्रभु यावे आ स्वर्ग डा गेय पाइब कामी तुराही ताप्तु। मिनु गो परमप्रभु यावे आ डोइती वोइशो सुन के सेल्शो चढेतीके आ ४ सुर रे सेंदा गूशो नेता। *प्रकाश ८:३; प्रस्थान ३६:१-३* १४मेको सेंदामी मेको तुराही ताप्ब परमप्रभु यावे आ स्वर्ग डा गेय पाइब कली “युफ्रेटीस माइशो ठेयब खोला आ नेक्थाम पाइशो ४ जना सैतान आ गेय पाइब आन कली प्रोइमी” देशो नेता। *प्रकाश १६:१२* १५मिनु मेको परमप्रभु यावे आ स्वर्ग डा गेय पाइबमी मेको आन कली प्रोइतु। मेकोपुकी डोइती मारदे पाइशो वोइशो बाक्तेक्म देशा हना, परमप्रभु आ देशो घन्टा, नाक्त, महिना नु बर्स नेल्ल रागी डा मुरपुकी भाग सां डा भाग का साइक्चा, दे ठीक पा वोइशो बाक्तेक्म। *प्रकाश ८:-*

१६मिनु गोमी “शारा डोइशो लडाइ पाइबपुकी २० करोड बाक्नीम” देशो नेता। १७मिनु मेको शारा नु शारा डोइक्बपुकी दोदेशो तातामी देशा हना, मेको शारा डोइक्ब आन कुचुमी पीतल के फेक्तीके फेक्शो तातामी। मेको फेक्तीके मी खोदेशो लल गिम गिम नु हौ ताता। मेको शारा आन पिया गुप्स आ पिया खोदेशो ताता। मिनु आन शोत्र रे मी, कुन नु गन्धक गूत। १८मिनु मेको मी, कुन नु गन्धक रे मुरपुकी भाग सां डा भाग का बेक्तेक्मे। १९मिनु मेको शारा आन मीलु चहिं बुस्स आ पिया खोदेशो तांइसाक्म। मोपतीके मेको शारा आन बोल शोत्र नु मीलुमी बाक्त। मिनु शोत्र नु मीलुमी मुर आन कली श्येत गेम्तेक्म।

२०मिनु मबेक्थु लीशो मुरपुकीमी मेको

आन मरिम्शो पचा मप्रोनेम। मार मरिम्शो पाप्तेक्म देंशा हना, वोल नु देवी देवता आन कली खुम्की पा सेउ पाप्तेक्म। मताइब, मनैब, मगाक्ब सुन, चांदी, कांसा, फुल्लु नु शी के सेल्शो मूर्ति आन कली खुम्की पा सेउ पाप्तेक्म। प्रकाश १६:६

२१मिनु मेकोपुकीमी मुर साइक्चा, तुना मुना पचा, चिन्ता बाक्चा, तेल्लेम पचा नु खुइ पचा मप्रोनेम। मिनु आन थुं यो परमप्रभु यावे गे मल्लेत्तेम।

### यूहन्नाम इम्चीली किताब जशो

१० मिनु नोले गोमी सक्ति पाइश्शो परमप्रभु यावे आ स्वर्ग डा गेय पाइब का गोस्सुमी गिल्सीशा, रागीमी यिशो ताता। मेको आ पियामी वाक्श दाप्शो बाक्त। मिनु मेको आ कुल नां खोदेशो नु आ खोइली हुरुर पा ब्रशो मी के थाम खोदेशो तांइसाक्व। २आ गुइमी इम्चीली प्राक्शो किताब शेशो बाक्त। मेको आ ग्युरा खोइली समुन्द्र तार नु आ पेरा खोइली चहिं रागी तार थेक्शा राप्त। ३मेकोमी गुप्स खोदेशो पा ठेयब सेंदामी ग्रीत। मोपा ग्रीमेनु, ७ ओटा बुंबुमी रेयके पाप्तेक्म। भजन संग्रह २६:३-६ ४मेको ७ ओटा बुंबु आ लोव्र ब्रेक्चाडानु, सरीड रे सेंदा कामी “मेको ७ ओटा बुंबु आन लोव्र मब्रेक्तो, मुर आन कली मशेंदो” देंशो नेंता। दानीएल १२:४,६

५मिनु डोंइती तशो परमप्रभु यावे आ स्वर्ग डा गेय पाइब ठेयब समुन्द्र नु रागीम खोइली थेक्बमी कसम जचा कली आ ग्युरा गुइ सरीड गे पोक्तु। ६मिनु मेकोमी दोपा कसम जाप्तु देंशा हना, गेना हना यो ब्रोंइशा बाक्ब, सरीड नु सरीडम बाक्ब नेल्ल सेल्ब, रागी नु रागीम बाक्ब

नेल्ल सेल्ब, समुन्द्र नु समुन्द्रम बाक्ब नेल्ल सेल्ब, परमप्रभु यावे आ नेंमी “मुल देश मपचा” दे कसम जाप्तु। दानीएल १२:७

७मिनु मेको आ कसम जशो लोव्र मार बाक्त देंशा हना “नेल्ल क्येडा नोले डा परमप्रभु यावे आ स्वर्ग डा गेय पाइबमी तुराही तबानु, परमप्रभु यावेमी आ लोव्र पाइब आन कली ‘मुल रिम्ची ना नुप्त’ दे डोंइती रे मशेंशो परमप्रभु यावे आ खुइश्शो लोव्र मुल दुम्चाप्तु” दे कसम जाप्तु। प्रकाश ११:१५; प्रेरित ३:२१

८मिनु मेको आं नेशो स्वर्ग डा सेंदामी आं कली लेंशा “लावो, मेको रागी नु समुन्द्र तार राप्शो परमप्रभु यावे आ स्वर्ग डा गेय पाइब आ गुइमी बाक्शो किताब ताक्को” देंशो नेंता। ९मिनु गो मेको परमप्रभु यावे आ स्वर्ग डा गेय पाइब आ नेक्था लती। मिनु गोमी मेको कली “मेको इम्चीली किताब गेयीनी” देंती। मेकोमी “ताक्को। मिनु जावो। इ शोव्रमी खुदो खोदेशो पा ब्रोव्रब। मिनु इ कोव्रजमी चहिं काइब” दे माइक्ती। इजीकीएल ३:१-३ १०मिनु गो मेको इम्चीली किताब परमप्रभु यावे आ स्वर्ग डा गेय पाइब आ गुइ रे ताक्शा डा मिन जाता। आं शोव्रमी खुदो खोदेशो जिज दुम्त। दाक्मानु चहिं आं कोव्रज कत। ११मिनु लोव्र पाइब कामी आं कली “गे लेंशा शुश मुरपुकी, शुश रागी, शुश लोव्र डा मुर नु शुश पिप आन डोंइती परमप्रभु यावे आ लोव्र नेंपाइक्चा माल्नेवे” देंशो नेंता। येरमीया १:६-१०

### यूहन्नाम पुक्तीक ताक्शो

११ मिनु परमप्रभु यावे आ स्वर्ग डा गेय पाइब कामी पुक्तीक का गेती। मेकोमी आं कली “लो, बोक्को।

परमप्रभु यावे आ खिं नु चढेतीके पुक्को। परमप्रभु यावे आ खिं आगाम सेउ पाइब आन कली हिक्को। इजीकीएल ४०:३; जकरिया ३:५-६; इजीकीएल ४२:२० २मिनु परमप्रभु यावे आ खिं डा लाडगा रागी रागी डा मुर आन कली गेशो बाक्त। मेको मपुक्को। मेकोपुकीमी परमप्रभु यावे आ योव्रशो सहर ४२ महिना सम्म खोइलीमी दिप्शा ताइशशा बिग्रेनीम” देत। लूका २१:२४

### परमप्रभु आ सांकछी निक्शी

३मिनु नोले गो परमप्रभु यावेमी आ सांकछी निक्शी आस कली मार लोव्र पशो नेता देशा हना “गे आं लोव्र पाइब दुम्नीसी। गो इस कली आं लोव्र पचा कली सक्ति गेनुड। गे निक्शीमी अरन्डी फेक्शा, हजार का सहे निक्शी ६० नाक्त सम्म आं लोव्र पाइनीसी” दे परमप्रभु यावेमी आ सांकछी निक्शी आस कली लोव्र पशो नेता। प्रकाश १२:६

४मिनु मेको सांकछी तेल रवा निक्शी नु दियारी निक्शी खोदेशो दुम्शा, रागी डा प्रभु आ डोंइती बाक्नीस। जकरिया ४:३, ११-१४ ५सु सुमी मेको निक्शी आस कली बिग्रेचा माल्नीमी, मेको साइक्चा पुंइसीनीम। दोपा साइक्चा पुंइसीनीम देशा हना, मेको आस शोव्र रे मी ग्रूशा, मेको साइक्चा पुंइसीनीम। ६मेको निक्शीमी परमप्रभु यावे आ लोव्र पाम्सेनु, रेउ मयिपाइक्ने चाप्नीस। मेकोमी ब्वाक्कु के हुश सेल्ने चाप्नीस। मिनु रागी कली मार श्येत गेचा दाक्तसे, मेकोन पने चाप्नीस। गिश खेयप मो पचा दाक्तसे, मिश खेयप यो पने चाप्नीस। १राजा १७:१; प्रस्थान ७:१६-२० ७मिनु मेको

निक्शीमी परमप्रभु यावे आ लोव्र थुम्से नोले, मेको पुं मपाइशो ढोडोडगा रे ठेयब जन्तु कुशा, मेको निक्शी नु राम्शी पा ग्रात। ग्राशा डा मिन मेको आस कली साइक्तु। प्रकाश १३:३; प्रकाश १३:७ ८मेको आस बेक्शो रां चहिं ठेयब सहर डा लांमी लीताक्से। मेको ठेयब सहर आ खुइशो नें चहिं सोदोम नु इजीप्त माइशशा बाक्त। मेको ठेयब सहरमी मुरपुकीमी मेको आस प्रभु कली शीम कांटी थोक्शा साइशशा बाक्तेक्म। ९मिनु थर नेल्ल डा, जात नेल्ल डा, आंम आंम लोव्र पाइब नु रागी रागी डा मुर नेल्लेमी मेको आस बेक्शो रां नाक्त सां नु आधा मेकेर बाक्त। मुरपुकीमी मेको आस कली तुरसुमी वोइक्चा मगेमे। १०मारदे हना मेको परमप्रभु यावे आ लोव्र पाइब निक्शीमी रागीम बाक्ब आन कली शुश श्येत गेतीके, रागीम बाक्बपुकीमी मेको आस कली साइशशा तशा, शुश ग्येरशा, मार मार गेमुम्तेक्म।

११मिनु नाक्त सां नु आधा नोले परमप्रभु यावे आ ब्रोंइचा गेब सोक्त मेको आस बेक्शो रांमी ओव्रत। मिनु मेको निक्शी छुल छाल बोक्शा राप्ताक्स। मिनु रागी रागी डा मुरपुकीमी मेको आस कली तशा थाम्पा हिंतेक्म। १२मिनु सरीड रे ठेयब सेंदामी मेको निक्शी आस कली “एक कुस” देशो नेताक्स। मिनु गोस्सुमी गिल्सीशा, इर सरीड लाम्ताक्से। मेको आस जोरी सत्रुपुकीमी मेको आस कली सरीड गे लशो ताम्तेक्म। १३मिनु मेको निक्शी लसानु, ठेयब खिनु कुत। मेको सहर डा १० भाग डा भाग का ब्रेत्त। मिनु ७ हजार मुर मेको खिनुमी बेक्तेक्म। मेको लीशो मुरपुकी चहिं क्युल क्युल



पा हिंशा, स्वर्ग डा परमप्रभु यावे कली मान पाम्तेक्म। १४ हिंचा डा श्येत निक्शी नुष्शा, नोले डा हिंचा डा श्येत जाक्चाप्तु।

प्रकाश ६:१२

### नेल्ल क्येडा नोले डा तुराही

१५ मिनु मेको नोले डा परमप्रभु यावे आ स्वर्ग डा गेय पाइबमी आ तुराही ताप्तु। मिनु स्वर्गमी ठेयब सेंदापुकी नेंता। मेकोपुकीमी “आंइ परमप्रभु नु आ ख्रीस्तमी रागी नेल्ल कली सासन पाइब दुम्ताक्से। मिनु गेना हना यो सासन पना पन बाक्नीसी” देशो नेंता। १६ मिनु परमप्रभु यावे आ डोंइती मेको २४ जना शेंब खाल्पा आन नित्तीकेमी निश्शा, परमप्रभु यावे आ डोंइती खुम्की पा बाप्शा मान पाम्तेक्म। प्रकाश ४:४,१० १७ मिनु मेकोपुकीमी “परमप्रभु यावे, गे नेल्ल सक्ति पाइश्शो परमप्रभु बाक्नीनी। गे मुल बाक्नीनी, डोंइती यो बाक्तीनी। इन ठेयब सक्तिमी सासन पचा गोइतीनी। १८ मिनु रागी रागी डा मुरपुकी गाइक्ताक्म। मिनु मेको आन पर्बम गाइक्ताक्नी। बेक्शो मुर आन कली निसाफ पची ना दुम्त। मिनु इन लोव्र पाइब, इन नोले खोइक्ब, इन नें कली मान पा हिंब, आइक्च नु ठेयब मुर नेल्ल आन कली इनाम गेची ना दुम्त। मिनु गे रागी कली बिग्रेब मुर आन कली बिग्रथ जाक्तीनी” दे परमप्रभु यावे कली देंतेक्म। भजन संग्रह २:३ १९ मिनु परमप्रभु यावे आ स्वर्ग डा खिं रोक्साक्व। मिनु मेको कबल पशो सन्दोस परमप्रभु यावे आ खिंम तांइसाक्व। मिनु चिला पाप्तु। शुश रेयके नु बुंबु पशो नेंसाक्व। खिनु यो कुत। मिनु ठेयब मुप्स यित। प्रकाश १५:५

### आल थिचा चिक्शो मीश मुर

१२ मिनु गो सरीडमी ठेयब चिन्ड का ताता। मेको चिन्ड दोदेब बाक्त देशा हना, मीश मुर का नां फेक्सीशा, तास्ला तारी राप्शो बाक्त। मेको आ पियामी १२ ओटा सोरुल के सिरपेच गुप्शो बाक्त। २ मिनु मेकोमी कोव्रज कुरशो बाक्त। मोपतीके सुत्केरी रोइम श्येत जशा, आल थिचा कली ग्रीशो बाक्त। ३ मिनु गो सरीडमी अर्को चिन्ड का ताता। मेको चिन्ड दोदेब बाक्त देशा हना, ठेयब लल बुस्स का बाक्त। मेको बुस्स के ७ ओटा पिया नु १० ओटा गोव्र बाक्तेक्म। आ ७ ओटा पियामी ७ ओटा मुकुट गुप्शो बाक्त। ४ मेको आ मीलुमी सरीड डा सोरुल भाग सां डा भाग का कीशा, रागीमी तोक्तीमी। मिनु मेको ठेयब बुस्स मेको आल थिचशो मीश मुर आ डोंइती राप्शा, आ आल ब्वचा कली रिम्शा बाक्त। दानीएल ८:१० ५ मिनु मेको मीश मुरुमी वोंइश आल का थित। मेको वोंइश आल नोले रागी डा मुर आन कली फलाम के कोक्केमी सासन पाइब दुम्ब। मिनु परमप्रभु यावे आ स्वर्ग डा गेय पाइबपुकीमी मेको वोंइश आल कली परमप्रभु यावे आ ठेयब नित्तीकेम लाइश्शा वोइक्तेक्म। भजन संग्रह २:६ ६ मिनु मेको मीश मुर आल थिशा नोले गोरशो रागीमी प्रोक्त। मेकेर परमप्रभु यावेमी बाक्तीके ठीक पशो बाक्त। मिनु मेको कली हजार का सहे निक्शी ६० नाक्त थुल्लेक्म। प्रकाश ११:३ ७ मिनु नोले स्वर्गमी परमप्रभु यावे आ ठेयब स्वर्ग डा गेय पाइब मिकाएल माइश्शो नु आ गेय पाइबपुकी गारशा,

ठेयब बुस्स नु आ गेय पाइबपुकी नु लडाइ पथ लाम्तेक्म। ८मिनु ठेयब बुस्स आ गेय पाइबपुकी लडाइ पा ब्रुम्तेक्म। मिनु नोले मेको ठेयब बुस्स नु आ गेय पाइबपुकीमी स्वर्गमी बाक्तीक मथिदेम। उत्पत्ती ३:१

९मिनु मेको ठेयब बुस्स आ नें मार बाक्त देशा हना, माइत बुस्स, दियाबलस, सैतान बाक्त। मिनु मेको रागी रागी नेल्ल डा मुर आन कली पाप पपाइक्चा कली रागीमी तोक्चा पुंडसीशो बाक्त। मिनु मेको आ गेय पाइबपुकी यो रागीमी तोक्चा पुंडसीशो बाक्तेक्म। प्रकाश २०:२; उत्पत्ती ३:१; लूका १०:१८ १०मिनु गो सरीडमी ठेयब सेंदा का नेंता। मिनु मेको सेंदामी “मुल थमा सुइक्ब आन कली आन पाप रे ब्रोंइतीके जाक्ने थुन्तु। आइ परमप्रभु यावे आ सक्ति तांडसाक्व नु आ ख्रीस्त आ अधिकार जाक्त। मारदे हना थमा सुइक्ब आन कली दोस गेब रागीमी तोक्चा पुंडसाक्व। मेकोमी नाक्दो नाक्त इं परमप्रभु यावे आ डोंइती आइ लोक्ब आन कली दोस गेशो बाक्त। प्रकाश ११:१५ ११मिनु थमा सुइक्बपुकीमी सैतान कली ग्राशो बाक्तेक्म। दोपा सैतान कली ग्राशो बाक्तेक्म देशा हना, पाठा आ हुश चढेशोमी नु आन सांकछी आन पतीके सैतान कली ग्राशो बाक्तेक्म। मेकोपुकीमी आंम कली ममिन्थु, येसु ख्रीस्त आ पर्बम साइक्चा पुंडसीचा यो महिंम। प्रकाश ७:१४; प्रकाश ६:६ १२मोपतीके स्वर्ग नु स्वर्गमी बाक्ब नेल्ल ग्येरसीन। तन्न रागी नु समुन्द्रम श्येत दुम्चाप्टु। मारदे हना सैतान थाम्पा गाइशशा, रागी नु समुन्द्रम यित। मारदे गाइक्ताक्व देशा हना, मुल आ गेय पचा शुश नाक्त मली, दे तुइक्ताक्व” देशो नेंता। १३मिनु मेको ठेयब बुस्सुम आंम

कली रागीमी तोक्शो तशा, मेको वोंइश आल थीब मीश मुर कली “साइक्नुड” दे खेदा पाप्टु। १४मिनु मेको मीश मुरुमी ठेयब ककाकुली आ फ्रां निक्शी ताक्तु। मारदे ताक्तु देशा हना, मेको ठेयब बुस्स रे ब्रोंइशा, गोरशो रागीमी बेरशा, प्रोक्चा कली ताक्तु। मेको गोरशो रागीमी परमप्रभु यावेमी आ दाक्ची ना सम्म मेकेर थुल्शो बाक्त। १५मिनु मेको ठेयब बुस्सुमी “मेको मीश मुर कली योल्दल” दे आ शोव्र रे खोला खोदेशो पा शुश ब्वाक्कु ग्रुंडताक्व। १६रागीमी चहिं मेको मीश मुर कली वारच पाप्टु। दोपा वारच पाप्टु देशा हना, रागी आ शोव्र पाक्शा, मेको ठेयब बुस्स आ शोव्र रे गूशो खोला कली दाक्तु। १७मिनु मेको ठेयब बुस्सुमी मीश मुर प्रोक्शो तशा, गाइशशा, मेको मीश मुर आ चच युइ नु राम्शी पथ लत। आ चच युइ चहिं सु नम देशा हना, परमप्रभु यावे आ शेंशो लोव्र टीब नु येसु कली थमा सुइशशा, आ लोव्र पाइब नम। १८मिनु मेको ठेयब बुस्स समुन्द्र आ नेक्था राप्शा, रिम्शा बाक्त।

### समुन्द्र रे गूशो जन्तु

१३ मिनु गो समुन्द्र रे ७ ओटा पिया नु १० ओटा ग्रोव्र पाइशो जन्तु का गूशो ताता। मेको आ १० ओटा ग्रोव्रमी १० ओटा मुकुट गुप्शो बाक्तेक्म। आ पियापुकीमी चहिं परमप्रभु कली शुक्शी पाइब नें ब्रेक्शो बाक्तेक्म। दानीएल ७:३-७ २मिनु आं तशो जन्तु जोइ खोदेशो बाक्त। आ खोइल चहिं वां के खोदेशो बाक्त। आ शोव्र गुप्स आ शोव्र खोदेशो बाक्त। मिनु मेको ठेयब बुस्सुमी आ सक्ति आ नित्तीके नु आ ठेयब अधिकार मेको जन्तु कली गेप्टु।

३मिनु मेको जन्तु आ ७ ओटा पिया डा का साइक्चा डा पा क्योरशो खोदेशो ताता। तन्न आ ठेयब गार साशो बाक्त। मिनु रागी रागी डा मुर नेल्ल मेको जन्तु तशा, छक लाक्शा, आ नोले खोइक्तेक्म।  
 ४ठेयब बुस्सुमी मेको जन्तु कली आ अधिकार गेतीके मुर नेल्लेमी ठेयब बुस्स कली खुम्की पा सेउ पाम्तेक्म। मिनु मेको जन्तु कली यो खुम्की पा “एको जन्तु खोदेशो ठेयब सु बाक्मे? सु एको नु जिशा ग्राने चाप्बा?” दे सेउ पाम्तेक्म।

५मिनु मेको जन्तु कली ठेयब लेशशा, ब्वाक्चा नु परमप्रभु आ पर्वम मरिम्शो लोत्र पचा कली शोत्र गेशो बाक्त। मेको कली ४२ महिना सम्म सासन पचा कली अधिकार गेशो बाक्त। प्रकाश ११:२  
 ६मेकोमी परमप्रभु यावे कली मरिम्शो लोत्र पाप्तु। मिनु मेकोमी आ नें आ पर्वम, आ बाक्तीके आ पर्वम नु आ बाक्तीकेमी बाक्ब आन पर्वम यो मरिम्शो लोत्र पाप्तु। ७मेकोमी परमप्रभु यावे आ योत्रशो मुरपुकी नु लडाइ पशा, ग्राचा कली अधिकार तशो बाक्त। मिनु मेको कली जात नेल्ल, मुर नेल्ल, आंम आंम लोत्र पाइब नु रागी रागी डा मुर नेल्ल आन कली सासन पतीके अधिकार यो गेशो बाक्त। प्रकाश ११:७; दानीएल ७:२१  
 ८मिनु सु सु आन नें क्योरशो पाठा आ ब्रॉइतीक किताबमी मब्रेक्शो बाक्मे, मेकोपुकीमी मेको जन्तु कली खुम्की पा सेउ पाइनीम। मेको किताब रागी सेल्चा क्येडा डोंइती रे बाक्त। ९सु सुमी परमप्रभु यावे आ लोत्र नेंशा, रुम्ने चाप्नीमी, मेकोमी नेन्मेक्ल। १०सु जेल्खानमी लचा योत्रसीशो बाक्मे, मेको जेल्खानमी लचा माल्ब। तन्न सुमी तरवारमी साइक्बा, मेको तरवारमी

साइक्चा पुंडसीब। मिनु परमप्रभु यावे आ योत्रशो मुरपुकीमी श्येत फाल्शो “परमप्रभु यावेमी तुइक्ब” दे थमा सुइशशा बाक्चा माल्नीम। उत्पत्ती ६:६; मत्ती २६:५२; प्रकाश १४:१२

### खप रे गूशो जन्तु

११मिनु गो खप रे अर्को जन्तु का गूशो ताता। मेको के पाठा के खोदेशो गोत्र निक्शी बाक्त। मिनु मेकोमी ठेयब बुस्स खोदेशो पा लोत्र पाइबाक्त। १२डोंइती डा जन्तु नु बाक्शा, मेको डोंइती डा जन्तु आ अधिकार यो पाइक्बाक्त। मिनु मेकोमी रागी डा मुर नेल्ल आन कली डोंइती डा जन्तु कली सेउ पपाइक्बाक्त। मेको डोंइती डा जन्तु चहिं तेको बाक्त देशा हना, आ बेक्चा डा गार साशो जन्तु बाक्त। १३मिनु मेको नोले डा जन्तुमी ठेयब छक लाक्चा डा गेय पाप्तु। मार छक लाक्चा डा गेय पाप्तु देशा हना, मेकोमी मुर आन डोंइती सरीड रे मी यिपाइक्तु। मत्ती २४:२४; २थिस्सलोनिकी २:६  
 १४मेकोमी डोंइती डा जन्तु नु बाक्शा, आ पशो छक लाक्चा डा गेयमी मुर आन कली “परमप्रभु आ सक्ति पाइशशो नड” दे जोल पा छक लाक्चा डा गेय पशा, मुर आन कली पाप पपाइक्तु। मार पाप पपाइक्तु देशा हना, मेकोमी रागी डा मुर आन कली “गार पाइशशो जन्तु आ मूर्ति सेल्चा” दे शेंताक्मी। १५मिनु मेकोमी जन्तु आ मूर्ति कली ब्रॉइचा सोक्त गेचा अधिकार यो तशो बाक्त। मिनु मेकोमी सोक्त गेवानु, मेको ब्रॉइतीक सोक्त पाइशशो मूर्ति लोत्र पचा गोप्तु। मिनु मेको जन्तुमी मूर्ति आ डोंइती खुम्की पा सेउ मपाइब मुर आन कली साइक्पाइक्तु। १६मिनु मेको जन्तुम मार अर्को गेय पाप्तु

देंशा हना, मेकोमी ठेयब नु आइक्च, शोंप पाइश्शो नु पुडग, वाइलीम वाइल नु मुर नेल्ल आन कली कि ग्युरा गुडमी कि कुप्फीमी चिन्ड वोइक्पाइक्तु। प्रकाश १६:२० १७मिनु सु सु चिन्ड मपाइश्शो बाक्मा, मेकोपुकीमी मारेइ ग्याप्ने नु लेयने मचबेम। मिनु मेको चिन्ड कि जन्तु आ नें कि आ हिक्तीक चिन्ड बाक्त। १८मेको जन्तु आ नें आ हिक्तीक चिन्ड आ अर्थ मार बाक्मे, दे तुइक्चा कली जोक्ब तुइक्ब थुं माल्ब। जोक्ब मुरुमी जन्तु आ हिक्तीक चिन्ड तुइक्ब, मारदे हना मेको मुर आ हिक्तीक नु गारब। मेको हिक्तीक चिहं ६ सहे ६६ बाक्ब। प्रकाश १५:२

### लाख का ४४ हजार मुर

१४ मिनु नोले गो मेको पाठा सियोन डांडामी राप्शो ताता। मिनु लाख का ४४ हजार मुर पाठा नु बाक्तेक्म। मेको आन कुप्फीमी येसु नु आ आफ आ नें ब्रेक्सीशो बाक्त। प्रकाश ७:४; प्रकाश ३:१२ २मिनु गो स्वर्ग रे सेंदा का नेंता। मेको सेंदा दोदेशो बाक्त देशा हना, शुश ब्वाक्कु आ रेयके नु ठेयब बुंबु पशो रेयके खोदेशो नेंता। तन्न शुश मुरपुकीमी ठेयब तार पाइश्शो ताप्तीके ताप्शो रेयके बाक्त। प्रकाश १:१५

३मिनु मेको ठेयब ताप्तीके ताप्बपुकीमी ठेयब नित्तीक आ डोंइती, मेको ४ ओटा सेस जन्तु नु शेंब खाल्पा आन डोंइती नक कुम्सो का पाम्तेक्म। मेको कुम्सो सुइमी शेंसीने मचबेम। तन्न मेको लाख का ४४ हजार मुरुम ला मेको कुम्सो शेंसीने चाप्तेक्म। ४मिनु मेको मुरपुकी रागी डा पाप रे डोन बाक्शो बाक्तेक्म। मिनु मेकोपुकी पाठा तेक तेक लमे, मेक मेक

लाइबाक्तेक्म। मेकोपुकी रागी डा मुर आन दाते रे गुंइशा, परमप्रभु यावे नु पाठा आस डोंइती डा योवसीशो मुर बाक्तेक्म। १कोरिन्थी ७:१,८ ५मिनु मेकोपुकीम काइ जोल मपशो बाक्तेक्म। मारदे हना पाप मपाइबपुकी बाक्तेक्म।

### स्वर्ग डा गेय पाइब सां आन लोव्र

६मिनु स्वर्ग आ दातेमी गो परमप्रभु यावे आ स्वर्ग डा गेय पाइब का बेरशो ताता। मेको रागीमी लीशो मुर आन कली गेना हना यो पाप रे प्रोंइब जाक्त, दे ग्येरपाइक्ब लोव्र शेंथ यित। मेको नेल्ल रागी डा, नेल्ल जात डा, नेल्ल लोव्र पाइब नु शुश मुर आन कली शेंथ यित। ७मिनु मेकोमी ठेयब सेंदामी “परमप्रभु यावेमी सरीड, रागी, समुन्द्र नु ब्वाक्कु बुक्तीके नेल्ल सेल्लु। मोपतीके इन पोक्च थेक्शा, परमप्रभु यावे कली मान पा हिनीन। मेको कली ठेयब सेलीन। मिनु ‘गे नेल्ल सेल्लब ननी’ देशा मान पने। मारदे हना मेको आ निसाफ पची ना दुम्त” देंत।

८मिनु परमप्रभु यावे आ स्वर्ग डा गेय पाइब अर्को कामी मेको डोंइती डा आ नोले खोइश्शा, मेकोमी “बेबीलोन माइश्शो ठेयब सहर खतम दुम्त। मारदे हना मेकोमी डोंइती नेल्ल रागी डा मुर आन कली पाप पपाइक्तु। रागी डा मुरपुकी बेबीलोन आ पर्बम परमप्रभु यावे आ गाइश्शो ताम्तेक्म” देंत। प्रकाश १८:३;

यसैया २१:६; येरमीया २५:१५-१६; येरमीया ५१:७

९मिनु सां आन दाते डा परमप्रभु यावे आ स्वर्ग डा गेय पाइबमी अर्को निक्शी आस नोले खोइश्शा, ठेयब सेंदामी “सु सुमी मेको जन्तु नु आ मूर्ति कली सेउ पाइनीमी, मेको आन कुप्फीमी कि

ग्युरा गुडमी चिन्ड वोइक्पाइक्नीमी,  
 प्रकाश १३:१२-१७ १० मेको आन कली तशा,  
 परमप्रभु यावे शुश गाइक्ब। मिनु मेको  
 मुरपुकीमी आ गाइश्शो तचा माल्नीम।  
 दोपा परमप्रभु आ गाइश्शो तचा माल्नीम  
 देंशा हना, पाप रे डोन बाक्ब परमप्रभु  
 यावे आ स्वर्ग डा गेय पाइब नु पाठा  
 आस डोंइती मेको मुरपुकी हुरुर पा ब्रशो  
 मी नु गन्धकम श्येत जचा माल्नीम।  
 भजन संग्रह ७५:७ ११ मेको मी आ कुन गेनायो  
 मकाप्ब। मेको जन्तु नु जन्तु आ मूर्ति  
 कली सेउ पाइबपुकी नु जन्तु आ नें आ  
 चिन्ड वोइक्पाइक्बपुकी नाक्दो नाक्ती  
 श्येत जना जन बाक्नीम” देंत।

१२ मेना रागीमी परमप्रभु यावे आ  
 योव्रशो थमा सुइक्बपुकीमी श्येत फाल्चा  
 माल्नीम। मारदे हना मेकोपुकीमी परमप्रभु  
 यावे आ अरेशो लोव्र पाइनीम। मिनु  
 येसु कली थमा सुइक्नीम। प्रकाश १३:१०  
 १३ मिनु गो स्वर्ग रे सेंदा का नेता। मेकोमी  
 “मुल रे सु सु प्रभु कली थमा सुइश्शा  
 बेक्नीमी, मेकोपुकी ग्येरसमल। मेको  
 लोव्र ब्रेक्तो” देंत। मिनु परमप्रभु यावे आ  
 सोक्तीमी “थमा, मेको मुरपुकी ग्येरसीशो  
 बाक्नीम। मारदे हना मेकोपुकीमी रागीमी  
 परमप्रभु यावे आ गेय पशा नाइक्नीम।  
 मिनु परमप्रभु यावेमी आन गेय तुइश्शा,  
 आन तचा डा गेब” देंत। फिलिप्पी १:२३;  
 यसैया ५७:२; हिब्रू ४:३०; १तिमोथी ५:२४-२५

### थमा मसुइक्ब आन कली निसाफ

१४ मिनु नोले गो बुश गोस्स का ताता।  
 मिनु मेको गोस्स तारी मुर का निश्शो  
 खोदेंशो ताता। मेको आ पियामी सुन के  
 सिरपेच गुप्शा डा मिन आ गुडमी हेश्शो  
 गुये का ग्याइश्शो ताता। दानीएल ७:१३;

मर्कूस १३:२६ १५ मिनु गो अर्को परमप्रभु  
 यावे आ स्वर्ग डा गेय पाइब कली  
 परमप्रभु यावे आ खिं रे गूशो ताता। मिनु  
 मेकोमी गोस्स तार बाक्ब कली ठेयब  
 सेंदामी “रागी डा बाली मीशो बाक्त।  
 मुल रिक्ची ना दुम्त। मिनु मुल रिक्चा  
 गोवो” देंत। योएल ४:१३; मत्ती १३:३६ १६ मिनु  
 गोस्सुमी निप्बमी गुये शेशा, रागी कली  
 मीशो बाली खोदेंशो पा रिक्तु।

१७ मिनु गो अर्को परमप्रभु यावे आ स्वर्ग  
 डा गेय पाइब कली परमप्रभु यावे आ खिं  
 रे गूशो ताता। मेको नु यो हेश्शो गुये का  
 बाक्त। १८ मिनु नोले अर्को परमप्रभु यावे  
 आ स्वर्ग डा गेय पाइब का धूप चढेतीके  
 रे गूशो ताता। मेकोमी मी कली अधिकार  
 पाइबाक्त। मेकोमी ठेयब सेंदामी हेश्शो  
 गुये शेयब कली “रागी अडगुर रू खोदेंशो  
 पा मीशो बाक्त। मोपतीके गुयेमी फल  
 सेक्चा गोवो” देंशो नेता। १६ मिनु परमप्रभु  
 यावे आ स्वर्ग डा गेय पाइबमी आ गुयेमी  
 रागी कली फल सेक्शो खोदेंशो पा सेक्तु।  
 सेक्शा खुप्शा, परमप्रभु यावे आ ठेयब  
 फल कोलमी वोइक्तु। मेको कोल चहिं  
 मार बाक्त देंशा हना, परमप्रभु यावे आ  
 गाइक्चा बाक्त। २० मिनु खाक्तीके सहर  
 रे डोन बाक्त। खाक्मेनु, मेको कोल  
 रे रस खोदेंशो पा हुश शांडसाक्ब। मिनु  
 मेको हुश १६ सहे स्तादीयोन डोन दोक  
 राप्शो शारा आ शोव्र सम्म लत। स्तादीयोन  
 का १८५ मिटर बाक्ब। यसैया ६३:३

### लाख का ४४ हजार मुर

१५ मिनु गो स्वर्गमी अर्को ठेयब  
 नु छक लाखका डा चिन्ड  
 ताता। मेको चिन्ड दोदेंशो बाक्त देंशा  
 हना, ७ जना परमप्रभु यावे आ स्वर्ग डा

गेय पाइबपुकीमी ७ ओटा श्येत गेचशो बाक्तेक्म। मिनु मेको श्येतपुकी नोले डा बाक्तेक्म। मारदे हना मेको आन नोले परमप्रभु आ गाइक्चा नुब्ब। प्रकाश १६:१

२मिनु गो सिसा नु मी ब्वाइशो दोम्ली खोदेशो दिंम का ताता। मेको दिंममी मुरपुकीम परमप्रभु यावे आ गेशो ठेयब ताप्तीके शेशा, राप्शो तातामी। मेको मुरपुकी चहिं सु बाक्तेक्म देंशा हना, मेकोपुकीमी मेको जन्तु कली ग्राशो बाक्तेक्मे। दोपा ग्रातेक्म देंशा हना, जन्तु नु जन्तु आ मूर्ति कली सेउ मपामे नु आ नें आ हिक्तीके चिन्ड यो मवोइक्पाइक्सीशो बाक्तेक्मे। प्रकाश ४:६

३मिनु परमप्रभु यावे आ वाइल मोसा नु पाठा आ कुम्सो पाप्तेक्म। मिनु मेको कुम्सोम मार लोत्र बाक्त देंशा हना “परमप्रभु यावे, गे नेल्ल सक्ति पाइशो परमप्रभु बाक्नीनी। इन गेय ठेयब नु छक लाक्चा बाक्नीमी। गे इन लां नेल्ल ठीक नु थमा बाक्नीमी। गे गेना हना यो पिप बाक्नीनी। प्रस्थान १५:१, ११;

येरमीया १०:६-७; ब्यवस्था ३२:४; भजन संग्रह १४५:१७

४नेल्लेमी इन कली मान पा हिंशा इन नें ठेयब सेल्लीमी। मारदे हना गे ला परमप्रभु बाक्नीनी। रागी रागी डा मुर नेल्ले इन डोंइती जाक्शा, पोक्च थैक्शा, खुम्की पा बाप्नीमी। मारदे हना इन निसाफ पतीके नेल्लेमी ताम्तेक्म” देंशो कुम्सो आ लोत्र बाक्त। भजन संग्रह ८६:६; येरमीया १६:१६-२१

### गाइशो डा ७ ओटा डप्का

५मिनु नोले गो स्वर्गमी परमप्रभु यावे आ खिं रोक्शो ताता। प्रकाश ११:१६

६मेकेर रे मेको ७ जना श्येत गेब परमप्रभु यावे आ स्वर्ग डा गेय पाइबपुकी ग्रातेक्म। मेकोपुकी रिम्शो टल्केशो बुश वा

फेक्शा, सुन के पेटी किप्शो बाक्तेक्म। ७मिनु मेको ४ ओटा सेस जन्तु डा कामी मेको ७ जना परमप्रभु यावे आ स्वर्ग डा गेय पाइब आन कली ७ ओटा सुन के डप्का गेप्तु। मेको सुन के डप्का गेना हना यो ब्रोंइशा बाक्ब परमप्रभु यावे आ गाइक्चामी ब्रीशो बाक्तेक्म। प्रकाश ४:६-८; प्रकाश १४:१०

८मिनु परमप्रभु यावे आ खिं परमप्रभु आ छेडछेड नु सक्ति डा कुनमी ब्रीशो बाक्त। मिनु परमप्रभु यावे आ ७ जना स्वर्ग डा गेय पाइबपुकीमी श्येत मगेमे सम्म सुइ परमप्रभु यावे आ खिं ओत्रने मचाप्बाक्तेक्म। यसेया ६:४; प्रस्थान ४०:३४; १राजा ८:१-११; इजीकीएल ४४:४

### मेको ७ ओटा श्येत

१६ मिनु नोले गो परमप्रभु यावे आ खिं रे ठेयब सेंदा का नेंता। मेको सेंदामी परमप्रभु यावे आ ७ जना स्वर्ग डा गेय पाइब आन कली “लने। परमप्रभु आ गाइक्चामी ब्रीशो ७ ओटा डप्का रागीमी मोतीन” देंत।

२मिनु डोंइती डा परमप्रभु यावे आ स्वर्ग डा गेय पाइबमी आ कुरशो डप्का रागी तार मोइक्तु। मिनु मेकोमी मोदानु, ठेयब जन्तु आ चिन्ड वोंइसीब नु आ मूर्ति कली सेउ पाइबपुकी मरिम्शो पा खाइक्ब गार मुप्तेक्म। प्रस्थान ६:१०-११

३मिनु अर्को परमप्रभु यावे आ स्वर्ग डा गेय पाइबमी आ कुरशो डप्का समुन्द्र तार मोइक्तु। मिनु मेकोमी मोदानु, समुन्द्र डा ब्वाक्कु क्योरशो मुर आन हुश खोदेशो दुम्त। मिनु समुन्द्र डा सेस जन्तु नु डांइ नेल्ल बेक्तेक्म।

४मिनु लेंशा अर्को परमप्रभु यावे आ स्वर्ग डा गेय पाइबमी आ डप्का खोला

नु ब्वाक्कु बुक्तीके तार मोइक्तु। मिनु मेकोमी मोदानु, मेको ब्वाक्कु हुश दुम्त।  
 प्रस्थान ७:१७-२१ ५मिनु ब्वाक्कु कली कोव्रब परमप्रभु यावे आ स्वर्ग डा गेय पाइबमी परमप्रभु यावे कली “इन मुर आन कली पशो निसाफ ठीक बाक्ब। गे मुल बाक्नीनी। मिनु गे डोंइती यो बाक्तीनी। गे का ला परमप्रभु बाक्नीनी। ६रागी डा मुरपुकीमी इन योव्रशो मुर नु इन लोव्र पाइब आन कली क्योरशा, आन हुश शाइक्पाइश्शा साइक्तेक्म। मिनु गे मेको रागी डा मुर आन कली हुश तूपाइक्तीनी। मार पामे, मेको ताम्तेक्म” देशो नेंता।

७मिनु गोमी मेको धूप चढेतीके रे सेंदा कामी लोव्र पशो नेंता। मेकोमी “परमप्रभु यावे, गे नेल्ल सक्ति पाइश्शो परमप्रभु बाक्नीनी। मारेइ मारेइ पने चाप्नीनी। इन पशो निसाफ थमा नु ठीक बाक्नीमी” देशो नेंता। प्रकाश ६:१३; प्रकाश ६:१०-११

८मिनु लेंशा अर्को परमप्रभु यावे आ स्वर्ग डा गेय पाइबमी आ कुरशो डप्का नां तार मोइक्तु। मिनु मेकोमी मोदानु, नांमी मुर आन कली मीम खोदेशो पा क्रोइक्चा गोप्तु। ९मोपा शुश होशेमी मुरपुकी दुप्शा, श्येत जाम्तेक्म। मिनु दुप्शो आ पर्वम परमप्रभु यावे आ नें कली सराप पाम्तेक्म। मारदे हना मेकोमी श्येत गोप्तु। मिनु मेको मुर आन थुं परमप्रभु यावे गे मलेत्तेम। परमप्रभु यावे कली मान यो मपाम।

१०मिनु लेंशा अर्को परमप्रभु यावे आ स्वर्ग डा गेय पाइबमी मेको आ कुरशो डप्का ठेयब जन्तु आ नित्तीकेमी मोइक्तु। मिनु मेकोमी मोदानु, मेको ठेयब जन्तु आ राज्यमी छिडछिड दुम्त। मिनु मुरपुकीम शुश श्येत जाम्तेक्म।

११मोपतीके स्वर्ग डा परमप्रभु कली सराप पाम्तेक्म। मारदे हना मेकोमी ठेयब मरिम्शो गार दुम्पाइश्शा, श्येत गोप्तु। तन्न आन मरिम्शो पचा मप्रोनेम।

१२मिनु लेंशा अर्को परमप्रभु यावे आ स्वर्ग डा गेय पाइबमी आ कुरशो डप्का युफ्रेटीस माइश्शो ठेयब खोलामी मोइक्तु। मिनु मेकोमी मोदानु, खोला डा ब्वाक्कु सोव्रत। मारदे सोव्रत देशो हना, नां दाप्तीके रे पीब पिप आन लां ठीक पचा कली सोव्रत। यसैया ११:१५-१६ १३मिनु गो ठेयब बुस्स, ठेयब जन्तु नु जोल पा परमप्रभु यावे आ लोव्र पाइब आन शोव्र रे क्रुकुकु खोदेशो वोल सां गूशो तातामी।

प्रकाश १२:३ १४मेकोपुकी छक लाक्चा डा चिन्ड कोइब सैतान आ गेय पाइब वोल बाक्तेक्म। मिनु मेकोपुकीमी परमप्रभु यावे, नेल्ल सक्ति पाइश्शो परमप्रभु आ ठेयब नाक्तीमी नु लडाइ पचा कली रागी रागी डा पिप आन कली ब्रथ लाम्तेक्म। मो दुम्मेनु, येसुमी मुर आन कली १५“नेनीन, गो खुइ खोदेब पा जाक्नुड। सु थमा सुइश्शा मइप्थु सेंशा, ठीक दुम्शा बाक्मे, मेको ग्येरसेक्ल। तन्न सु पाप पाइबा, मेको शिशा गाक्ब मुर खोदेब पा मुने दोक्ब” दे येसुमी माइक्तीमी। १थिस्सलोनिकी ५:२ १६मिनु मेको वोल सांमी रागी रागी डा पिप ब्रथ लशा, जाक्शा, हिल्लू लोव्रमी आरमागोडोन माइश्शो रागीमी खुम्साक्म।

१७मिनु नोले डा परमप्रभु यावे आ स्वर्ग डा गेय पाइबमी आ कुरशो डप्का फशेमी मोइक्तु। मिनु मेकोमी मोदानु, परमप्रभु यावे आ खिं रे नु आ नित्तीक रे ठेयब सेंदा कामी “मुल नुप्त” देशो नेंता। १८मिनु चिला, ठेयब रेयके, बुंबु

पशा, ठेयब खिनु कुत। मुरपुकी रागीमी बाक्मानु, मोमो ठेयब खिनु गेनायो मकुशो बाक्माक्त। १६मिनु मेको ठेयब सहर सां दुम्त। रागी रागी डा सहरपुकी ब्रेत्तेक्म। मिनु परमप्रभु यावेमी बेबीलोन ठेयब सहर कली फ्रुक्तु। मारदे फ्रुक्तु देशा हना, मेको मुर आन पाप तशा “गो सजाइ गेनुडमी” दे गाइशशा फ्रुक्तु। प्रकाश १४:८-१० २०मेना टापु नेल्ल ब्वाक्कुमी सुम्साक्म, डांडापुकी ब्रेशशा, दिंम दुम्तेक्म। प्रकाश ६:१४ २१मिनु मुर आन बाक्तीकेमी शुश मुप्स यित। मेको मुप्स टलेन्ट का सम्म हेल्लो बाक्तेक्म। मिनु मेको मुप्स मुर तार दोक्मेनु, मुरपुकी मेको मुप्स तशा, परमप्रभु यावे कली सराप पाम्तेक्म। मारदे हना मेको मुप्सीम रागीमी बाक्ब मुर आन कली शुश हिंचा डा श्येत गेप्तु। टलेन्ट ३५ किलो कोदेशो बाक्ब। प्रस्थान ६:२३

### ठेयब तेल्लेम कली सजाइ

**१७** नोले गो परमप्रभु यावे आ स्वर्ग डा गेय पाइब का ताता। मेको सु बाक्त देशा हना, मेको डोंइती डा ७ जना श्येतमी ब्रीशो डप्का कुरबपुकी डा का बाक्त। मिनु मेकोमी “एके पिवो, गो इ कली ब्वाक्कु तार बाक्ब ठेयब तेल्लेम कली गेशो सजाइ कोइनन। प्रकाश १५:१ २रागी रागी डा पिपपुकीमी मेको नु तेल्लेम पाम्तेक्म। मिनु मेको आन तेल्लेम पशो तशा, रागी रागी डा मुरपुकीमी यो मोदेशो पाम्तेक्म” दे आं कली देंत।

३मिनु मेकोमी आं कली परमप्रभु यावे आ सोक्तीमी बाक्शा, मुर मबाक्तीकेमी लाइक्ती। मिनु गो मीश मुर का लल

जन्तु तारी निश्शो ताता। मेको जन्तु दोदेशो तांइसाक्व देशा हना, आ रां नेल्ल परमप्रभु यावे कली मरिम्शो लोव्र ब्रेक्शा वोइशशा बाक्त। मेको ७ ओटा पिया नु १० ओटा ग्रोव्र पाइशशा बाक्त। ४मिनु मेको मीश मुर दोदेशो तांइसाक्व देशा हना, पिप आन फेक्शो खोदेशो वा नु लल वा फेक्शो बाक्त। सुन, हीरा नु मोती पांइशो बाक्त। मेकोमी सुन के कचौरा कुरशो बाक्त। मेको कचौरा आ तेल्लेम पतीके, ग्रांग्रा दिचा डा नु मरिम्शो गेयमी ब्रीशो बाक्त। येरमीया ५१:७ ४मिनु मेको आ कुप्फीमी खुइशशा लोव्रमी आ नें ब्रेक्शो बाक्त। मार ब्रेक्शो बाक्त देशा हना “बेबीलोन ठेयब सहर, तेल्लेमपुकी नु नेल्ल रागी रागी डा ग्रांग्रा दिचा डा आन ममा” दे ब्रेक्शो बाक्त। ६मिनु गो मेको मीश मुर कली परमप्रभु यावे आ योव्रशो मुर नु येसु आ सांकछी आन हुशेमी दुक्शो ताता। मेको कली तडानु, गो शुश छक लाक्ती। प्रकाश १८:२४ ७परमप्रभु यावे आ स्वर्ग डा गेय पाइबमी चहिं आं कली “गे मारदे छक लाक्डे? मेको मीश मुर नु मेको आ डोइशशा ७ ओटा पिया नु १० ओटा ग्रोव्र पाइशशा जन्तु आस खुइशशा लोव्र गो इ कली शेनुड। ८इ तशो जन्तु डोंइती बाक्त, मुल चहिं मबा। तन्न नोले पुं मपाइशशा ढोडोडगा रे कुशा खतम दुम्ब। रागी सेल्चा रे डा ब्रोंइतीक किताबमी आन नें मब्रेक्शो मुरपुकी चहिं मेको जन्तु तशा छक लाक्नीम। मारदे हना मेको जन्तु डोंइती बाक्त, मुल मबा, नोले जाक्ब।

९रुप्ब मुर आन कली एको तुइक्तीके लोव्र बाक्ब। मेको ७ ओटा पिया ७ ओटा डांडा नम। मेको मीश मुर मेको डांडा तार



निप्ब। प्रकाश १३:१८ १०मिनु मेको ७ ओटा डांडापुकी ७ ओटा पिप यो नम। मेको रे ५ ओटा बेक्शा लाक्तेक्म। मिनु कामी सासन पना पन बाक्ब। अर्को लीशो का चहिं मुल सम्म मजाक्शो बाक्त। मिनु नोले जाक्शा डा मिन, छिन का ला सासन पाइब। ११मिनु मेको डोंइती बाक्शो नु मुल मबाक्शो जन्तु चहिं मेको अर्को ७ ओटा पिप आन नोले जाक्शो बाक्ब। मिनु नोले जाक्शो यो, मेको ७ ओटा रे जाक्ब। मिनु मेको नरक लाइब।

१२मिनु मेको इ तशो १० ओटा ग्रोव्र चहिं मुल सम्म सासन पचा मतशो १० जना पिप नम। मिनु मेको आन कली नु ठेयब जन्तु कली घन्टा का पिप आन अधिकार गेशो बाक्ब। प्रकाश १३:१ १३मेको १० जना पिप थुं का दुम्शा, आन सक्ति नु अधिकार ठेयब जन्तु कली गेनीम। १४मोदेशो दुम्मेनु, मेकोपुकी पाठा नु लडाइ पाइनीम। मिनु लडाइमी पाठा ग्राब। मारदे पाठा ग्राब देशा हना, मेको पाठा प्रभु आन प्रभु नु पिप आन पिप बाक्ब। मिनु मेको नु बाक्शोपुकी आ ब्रेशो नु योव्रशो मुरपुकी बाक्नीमी। मेको नु बाक्बपुकी आ ब्रेशो नु योव्रशो दीगो पाइब यो बाक्नीमी” दे आं कली देंत। प्रकाश १६:१६; प्रकाश १६:१४

१५मिनु मेको परमप्रभु यावे आ स्वर्ग डा गेय पाइबमी लेंशा “तेल्लेम आ नेक्था डा शुश ब्वाक्कु, मार बाक्ब देशा हना, मेको मुरपुकी नम। मिनु मेको शुश मुर आन हुल, रागी रागी डा मुर नु शुश लोव्र ब्वाक्ब मुर बाक्नीम। यसैया ८:७; येरमीया ४७:२

१६मेको इ तशो १० ओटा ग्रोव्र नु मेको ठेयब जन्तु मेको तेल्लेम आ जोरी सत्रु दुम्नीम। मेको कली श्येत गेशा,

आ फेक्शो वा पुइक्नीम। मिनु आ श्ये ब्वाइनीम। मिनु आ लीशो नेल्ले मीम चोइनीम। १७मारदे मोदेशो पाइनीम देशा हना, परमप्रभु यावेमी आ देशो थमा दुम्पाइक्चा कली मेको आन थुं का दुम्पाइक्तीमी। मिनु मोपा मेको १० जना पिपमी राज्य नु सक्ति ठेयब जन्तु कली गेनीम। परमप्रभु यावे आ लोव्र खाप्चा कली मोदेशो दुम्ब। १८मिनु इ तशो मीश मुर चहिं ठेयब सहर बाक्ब। मेको रागी रागी डा पिप आन कली सासन पाइब बाक्ब” दे शेताक्वी। प्रकाश १८:१०

### बेबीलोन सहर नुप्त

१८ मिनु नोले गो शुश अधिकार पाइशो परमप्रभु यावे आ स्वर्ग डा गेय पाइब का सरीड रे यिशो ताता। मेको आ टल्केशोमी रागी नेल्ल छेडछेड दुम्त। इजीकीएल ४३:२ २मिनु मेकोमी ठेयब सेंदामी “मेको ठेयब बेबीलोन सहर ब्रेशो नुप्त। मेको ब्रेशो सहर वोल आन बाक्तीके जेल्लखान दुम्त। मेको ग्रांग्रा दिचा डा चिक्ब आन जेल्लखान दुम्त। प्रकाश १४:८; येरमीया १५:३६ ३मारदे मेको सहर मोदेशो दुम्त देशा हना, रागी रागी डा मुर नेल्लेमी आ ग्रांग्रा दिचा डा गेय शेंसीशा मोदेशो पाम्तेक्म। मिनु रागी रागी डा पिपपुकीमी यो मोदेशो पाम्तेक्म। मिनु रागी रागी डा ग्याप्ब लेयबपुकी मेको सहर डा शुश थोव्रक रे शोप पाइशो दुम्तेक्म” देंत। यसैया ५१:७; नाहुम ३:४ ४मिनु नोले स्वर्ग रे अर्को सेंदा का नेंता। मेको सेंदामी “आं मुरपुकी, मेको सहर रे गूशा पिने। मेकेर रे मगूतीनी हना, गे मेकोपुकी खोदेशो मरिम्शो पाइनीनी। मोपा मरिम्शो पाइतीनी

हना, मेको खोदेशो पा सजाइ ताइनीनी।  
 यसैया ४८:२०; येरमीया ५०:८; येरमीया ५१:६,४५;  
 २कोरिन्थी ६:१७ ५मेको आन मरिम्शो पशो  
 देल्शा, सरीड सम्म जाक्शो बाक्त।  
 मिनु परमप्रभुमी मेको आन मरिम्शो  
 पशो मिम्शो बाक्त। उत्पत्ती १८:२०-२१;  
 येरमीया ५१:६ ६मिनु गे इन कली गेशो  
 श्येत मेको कली लेत्तीन। श्येत का  
 ला ममाइ, निक्शी खेयप श्येत गेने। इन  
 कली गेशो श्येत निक्शी खेयप गेचा ठीक  
 दुम्ब। भजन संग्रह १३७:८; येरमीया ५०:१५,२६;  
 २थिस्सलोनिकी १:६ ७मिनु आंम कली गिश  
 ठेयब सेला, मिश श्येत गेशा, सुर्ता नु  
 रोंका पपतीन। मिनु मेकोमी आ थुंमी  
 चहिं 'गो पिपीम नड। गो वोंइश बेक्शो  
 मीश मुर मनड। मोपतीके गो सुर्ता गेनायो  
 मपाइनुड' देंब। यसैया ४७:७-९ ८मोपा मोमो  
 ठेयब लेशो लोव्र पतीके, काबु मेको  
 कली श्येत दुम्ब। मेको कली मार श्येत  
 दुम्ब देशा हना, मेको सहरमी मुर साइक्ब  
 रोड जाक्ब, मिनु रोंका पाइनीम, अन्काल  
 यो दुम्ब। मिनु मेको सहर मीम दुप्शा पुलु  
 दुम्ब। मेको श्येत नेल्ल मारदे दुम्ब देशा  
 हना, मेको आन कली निसाफ पाइब  
 परमप्रभु यावे सक्ति पाइशो बाक्ब"  
 देशो नेंता।

### मुरपुकी बेबीलोन तशा डाक्शो

९मिनु रागी रागी डा पिपपुकी मेको  
 नु तेलेम पाम्तेक्म। मेको आ शोंप यो  
 दाक्शो बाक्तेक्म। मोपतीके मेकोपुकी  
 ग्रोइशो सहर कली तशा, रोंका पा  
 डाक्नीम। १०मिनु मेको आ श्येत तशा  
 हिंशा, डोन रे कोव्रबपुकीमी "आबी,  
 आबी, मेको ठेयब बेबीलोन माइशो  
 सहर गिश दारशो सेल्शो बाक्त। मुल

चहिं घन्टा कामी इ निसाफ दुम्त" देंनीम।  
 येरमीया ५१:८ ११मिनु रागी रागी डा ग्याप्ब  
 लेयबपुकी मेको सहर तशा, डाक्शा रोंका  
 पाइनीम। मारदे डाक्शा रोंका पाइनीम  
 देशा हना, मेको आन लेयचा डा थोव्रक  
 सुइमी मग्याप्नीम। १२आन लेयचा डा  
 थोव्रक मार बाक्त देशा हना, सुन, चांदी,  
 हीरा, मोती, शुश क्येट लाइब सुती वा,  
 प्याजी रड डा वा, रेसम वा, लल वा,  
 ब्रोव्रशो रिना पाइशो शी, हात्ती आन  
 खुइ, शुश क्येट लाइब शी, कांसा, फलाम  
 नु दारशो फुल्लु रे सेल्शो थोव्रकपुकी  
 बाक्तेक्म। १३मिनु सिन्कौली, चां  
 खेक्तीक तेल, मस्ला, ब्रोव्रशो रिना पाइब  
 तेल, धूप, अडगुर शांबु, जचा तेल,  
 थम रिम्शो फस, चेरब, बी ब्यफ, भेडा,  
 शारा, बग्गी नु वाइलीम वाइल मेको मुर  
 आन लेयतीक थोव्रकपुकी बाक्तेक्म।  
 १४मिनु मेको ग्याप्ब लेयबपुकीमी मेको  
 सहर कली "इन दाक्शो ब्रोव्रशो फल  
 फुल जाम्तेक्म। इन ग्योम्सीचा, इन शोंप  
 पाइशो दुम्चा नेल्ल गेनायो मथित्चा डा  
 पा जाम्शा लाम्तेक्म" देंतेक्म। १५मिनु  
 मेको सहर रे शोंप पाइशो ग्याप्ब  
 लेयबपुकी सहर रे डोन बाक्शा, मेको  
 सहर कली गेशो सजाइ तशा हितेक्म।  
 मिनु मेकोपुकीमी डाक्शा रोंका पशा,

१६"आबी आबी, मेको ठेयब सहर,  
 मेको सहर डा मुरपुकी शुश क्येट लाइब  
 सुती वा, प्याजी नु लल रड डा वा  
 फेक्शो बाक्तेक्म। मिनु मेकोपुकीम शुश  
 सुन, हीरा नु मोती पांइशो बाक्तेक्म।  
 प्रकाश १७:४ १७तन्न मुल घन्टा कामी  
 मेको सहर डा शोंपपुकी खतम दुम्तेक्म"  
 देंतेक्म। मिनु डोंगा चलेबपुकी, डोंगामी  
 गेय पाइबपुकी नु डोंगामी डोइशशा

ग्याप्ब लेयब मुर नेल्ल सहर रे डोन राप्शा, इजीकीएल २७:२७-३६ १८ सहर दुप्शो कुन तशा “मेरे सहर खोदेंब ठेयब अर्को मबा” दे ग्रीतेक्म। १९ मिनु मेकोपुकी सुर्ता पशा, रोंका पा डाक्तेक्म। मेकोपुकीमी “आबी आबी, मेरे ठेयब सहर। मेरे सहर डा डोंगा आन होव्रपपुकी मेरे सहरमी मार मार लेयशा, शोंप पाइश्शो दुम्शो बाक्तेक्म। तन्न घन्टा कामी मेरे सहर जाम्शा लत। २० मिनु स्वर्गमी बाक्ब नेल्ले ग्येरसीने। परमप्रभु यावे आ योव्रशोपुकी, ख्रीस्त आ सोइश्शोपुकी नु परमप्रभु यावे आ लोव्र पाइबपुकी ग्येरसीने। मारदे हना, परमप्रभु यावेमी इन कली गेशो श्येत आ पर्वम मेको कली सजाइ गेप्तु” देशो नेता।  
येरमीया ५१:४८

### बेबीलोन सहर मथिंसीब

२१ मिनु बोल्यो परमप्रभु यावे आ स्वर्ग डा गेय पाइबमी ठेयब यात खोदेशो फुल्लु का क्युक्तु। मिनु मेको फुल्लु कली समुन्द्रमी ताइक्ताक्व। मेको परमप्रभु यावे आ स्वर्ग डा गेय पाइबमी “मेको फुल्लु खोदेशो पा ठेयब बेबीलोन सहर ताइक्चा पुंइसीब। मोपतीके मेको सहर गेनायो मथिंसीब। येरमीया ५१:६३-६४ २२ मिनु मेको ठेयब सहर दोपा नुप्ब देशा हना, ठेयब ताप्तीके ताप्शो, कुम्सो पशो मुराली ताप्शो नु तुराही ताप्शो मेकेर लेंशा मनेंसीब। मिनु मार मार सेल्ब सीप पाइश्शो मुरपुकी मेकेर लेंशा मथिंसीब। यात हिल्लो आ रेयके मेकेर का यो लेंशा मनेंसीब। यसैया २४:८; इजीकीएल २६:१३ २३ मेकेर बत्ती दाशो हाम्सो का यो लेंशा मतांइसीब। मेकेर ग्युम्ले नु ग्युम्ली आस सेंदा लेंशा मनेंसीब। मारदे मोदेशो दुम्ब

देशा हना, रागी डा ठेयब मुर ग्याप्ब लेयबपुकी बाक्तेक्म। मेकोपुकीमी मेको आन टुना मुनामी रागी नेल्ल डा मुर आन कली दूली लां खोइक्पाइक्तेक्म। येरमीया २५:१०; यसैया २३:८ २४ मिनु मेको सहर डा मुरपुकीमी परमप्रभु यावे आ लोव्र पाइबपुकी नु परमप्रभु यावे आ योव्रशो मुर आन कली साइश्शो बाक्तेक्म। नेल्ल रागी डा सु सु मुर साइश्शो बाक्मा, मेको सहरमी साइश्शो बाक्तेक्मे” दे परमप्रभु यावे आ स्वर्ग डा गेय पाइबमी देत।

प्रकाश ६:१०; प्रकाश १७:६

### पाठा आ ग्युंबे

१९ मिनु नोले गो स्वर्गमी शुश मुरपुकीम कुम्सो पशो ठेयब रेयके खोदेशो नेता। मिनु मेकोपुकीमी “हाल्लेलया, आंइ परमप्रभु ला मुर आन कली पाप रे प्रोंइब बाक्ब। छेडछेड नु सक्ति नेल्ल आंइ परमप्रभु यावे केन बाक्ब। २ मारदे हना परमप्रभु यावे आ पशो निसाफ थमा नु ठीक बाक्ब। मिनु परमप्रभु यावेमी रागी नेल्ल डा मुर आन कली खतम सेल्ब तेल्लेम कली ठीक पा सजाइ गेप्तु। मेको तेल्लेममी शुश परमप्रभु यावे आ वाइलीम वाइल आन कली साइक्तीके, मुल मेको कली क्येक्क लेत्ताक्व” दे ग्रीशो नेता।  
प्रकाश ६:३०; ब्यवस्था ३२:४३ ३ मिनु मेको स्वर्गमी बाक्बपुकीमी लेंशा “हाल्लेलया, मेको सहर दुप्शो आ कुन गेनायो मनुप्थु कुइब” देंतेक्म।

४ मिनु मेको २४ जना शेंब खाल्पा नु ४ ओटा सेस जन्तुपुकीमी आ ठेयब नित्तीकेमी निश्शो परमप्रभु यावे कली खुम्की पा बाप्शा सेउ पाम्तेक्म। मिनु

मेकोपुकीमी “आमेन, हाल्लेलया” दैतेक्म। प्रकाश ४:४; प्रकाश ५:३१; प्रकाश ४:६; भजन संग्रह १०६:४८ ५मिनु परमप्रभु यावे आ नित्तीक रे सेंदा का गूशो नेंता। मेको सेंदामी “परमप्रभु यावे आ वाइलीम वाइल, परमप्रभु यावे कली मान पा हिंब आइक्च नु ठेयब मुर नेल्लेमी ‘आंइ परमप्रभु यावे नेल्ल क्येडा ठेयब बाक्ब’ देनीन” देंशो नेंता।

६मिनु नोले गो शुश मुर आन सेंदा ठेयब खोला आ रेयके नु ठेयब बुंबु आ रेयके खोदेशो पा नेंता। मिनु मेको सेंदामी “हाल्लेलया, प्रभु, नेल्ल सक्ति पाइश्शो आंइ परमप्रभु यावे नेल्ल सासन पाइब बाक्ब। ७गो नेल्ल ग्येरसय। गो नेल्लेमी ‘इन सक्ति नेल्ल क्येडा ठेयब बाक्ब’ देंय। गो नेल्लेमी परमप्रभु यावे कली मान पय। मारदे हना पाठा आ ग्युंबे दुम्चशो बाक्त। मिनु आ ग्युम्लीम आंम कली ग्योम्सीशा, ठीक दुम्शो बाक्त। प्रकाश २१:६ ८मेको ग्युम्ली कली सुती के रिम्शो बुश टल्केशो वा फेक्चा कली गेशो बाक्त” देंशो नेंता। मिनु मेको सुती के रिम्शो वा मार बाक्ब देंशा हना, परमप्रभु यावे आ योत्रशो आन ठीक पतीके बाक्ब। यसैया ६१:१० ९मेको परमप्रभु यावे आ स्वर्ग डा गेय पाइबमी आं कली “एको लोत्र ब्रेक्तो। पाठा आ ग्युंबे जचा कली ब्रेत्चा पुंडसीबपुकी ग्येरसीशो मुरपुकी बाक्नीम” दे माइक्ती। मिनु मेकोमी लेंशा आं कली “मेको थमा पा परमप्रभु आ लोत्र बाक्ब” दे माइक्ती। लूका १४:१५ १०मिनु नोले गो मेको परमप्रभु यावे आ स्वर्ग डा गेय पाइब कली सेउ पचा कली आ खोइलीमी बाप्ती। मेकोमी चहिं आं कली “मपावो। गो गे नु इ लोकबपुकी खोदेशो येसु आ लोत्र

पाइब, परमप्रभु यावे आ वाइल नड। परमप्रभु यावे कली मान पावो। मारदे हना येसु आ लोत्र पाइबपुकीम परमप्रभु यावेमी तुइक्पाइश्शो लोत्र ला पाइनीम” दे माइक्ती। प्रकाश २२:८-९

### बुश शारा डोइक्ब

११मिनु नोले गो स्वर्ग रोक्सीशा, बुश शारा का ताता। मेको शारा तार डोइक्ब का बाक्त। मेको शारा डोइक्ब सु बाक्त देंशा हना, दीगो नु थमा पाइब माइश्शो बाक्त। मेको घूस मताक्थु ठीक पा निसाफ पाइब बाक्त। लडाइ पाइब यो बाक्त। मती २४:३०; प्रकाश ३:३४; यसैया ११:४-५

१२मिनु मेको दोदेंब तांइसाक्व देंशा हना, मेको आ मिक्च हुरुर पा ब्रशो मी खोदेशो तांइसाक्व। आ पियामी शुश मुकुटपुकी बाक्तेक्म। मिनु मेको तारी नें का ब्रेक्शो बाक्त। मेको नें सुइमी मतुइक्नीम। मेकोम ला तुइक्ब। प्रकाश १:३४; प्रकाश ३:१२ १३मिनु मेकोमी हुशेमी खुम्शो वा फेक्शो बाक्त। आ नें परमप्रभु यावे आ लोत्र माइश्शो बाक्त। यसैया ६३:१-३; यूहन्ना १:१ १४मिनु स्वर्ग डा

फौजपुकी बुश शारा डोइश्शा, मेको आ नोले खोइश्शो बाक्तेक्म। मेको शारा डोइक्बपुकी रिम्शो बुश सुती के वा फेक्शो बाक्तेक्म। प्रकाश १७:३४ १५मिनु मेको डोंइती डा बुश शारा डोइक्ब आ शोत्र रे रागी रागी डा मुर आन कली साइक्चा कली हेश्शो तरवार का गूत। मिनु मेकोमी फलाम के कोक्केमी मेको आन कली सासन पाइब, नेल्ल सक्ति पाइश्शो परमप्रभु यावे आ गाइक्चा डा कोल खोइलीमी दिम्ब। भजन संग्रह २:६; प्रकाश १४:१६-२० १६मिनु मेको डोंइती डा

शारा डोइक्ब आ वा नु आ फिलामी नें का ब्रेक्शो बाक्त। मार नें ब्रेक्शो बाक्त देंशा हना, पिप आन पिप नु प्रभु आन प्रभु, दे ब्रेक्शो बाक्त। प्रकाश १:५; १तिमोथी ६:१५

### ठेयब जन्तु नु जोल पाइब

१७मिनु नोले गो परमप्रभु यावे आ स्वर्ग डा गेय पाइब का नांमी राप्शो ताता। मेकोमी शुश ग्येत्थ सरीडमी बेरब चिक्ब आन कली ठेयब सेंदामी “परमप्रभु यावे आ गेशो ब्वचा कली खुम्सीशा यिने। इजीकीएल ३६:४, १७-२० १८मार ब्वचा कली यिने देंशा हना, पिपी, कप्तान, बोल्यो मुर, शारा, शारा डोइक्ब, वाइलीम वाइल, आइक्च नु ठेयब मुर नेल्ल आन श्ये ब्वचा कली यिने” दे ग्रीशा माइक्तीमी।

१९मिनु गो ठेयब जन्तु नु रागी डा पिप आन फौजपुकी मेको डोंइती डा बुश शारा डोइक्ब नु आ फौजपुकी नु लडाइ पचा कली खुम्सीशो ताता। प्रकाश १६:१४, १६ २०मोपा मेकोपुकी लडाइ पामेनु, मेको ठेयब जन्तु नु जोल पा परमप्रभु यावे आ लोव्र पखु पाइब आस कली ग्याइक्ताक्म। परमप्रभु यावे आ लोव्र पखु पाइब चहिं ठेयब जन्तु नु बाक्शा, छक लाक्चा डा गेय पाइब बाक्त। मोपा मेको ठेयब जन्तु नु आ मूर्ति कली पूजा पाइब नु आ चिन्ड वोइक्ब आन कली मरिम्शो लां शेंशा खोइक्पदा बाक्त। मिनु मेको निक्शी सेसीन गन्धक नु ठेयब मी ब्रतीकेमी हुम्चा पुंडसाक्स। प्रकाश १३:११-१७; २थिस्सलोनिकी २:८ २१मिनु लीशो मेको आस फौजपुकी चहिं मेको बुश शारा डोइक्ब आ शोव्र रे गूशो तरवारमी साइक्चा पुंडसाक्म। मिनु चिक्बपुकी मेको नेल्ल आन श्ये ब्वशा रूतेक्म।

### सैतान कली पाइश्शो

२० मिनु नोले गो परमप्रभु यावे आ स्वर्ग डा गेय पाइब स्वर्ग रे पुं मपाइश्शो ढोडोडगा डा सांचो नु ठेयब साडलो शेशा, यिशो ताता। प्रकाश ६:१ २मिनु मेकोमी ठेयब बुस्स कली ग्याइश्शा पाइक्ताक्व। मेको ठेयब बुस्स आ नें मार बाक्त देंशा हना, साड डोंइती डा बुस्स, दियाबलस नु सैतान मेको आ नें बाक्त। मिनु मेको परमप्रभु यावे आ स्वर्ग डा गेय पाइबमी मेको कली हजार का बर्स सम्म पाइक्ताक्व। दियाबलस आ देशो “मुर आन कली खाल्ब” बाक्ब। प्रकाश १२:६ ३मिनु रागी रागी डा मुर आन कली मरिम्शो लां मकोंइदल, दे मेको कली पुं मपाइश्शो ढोडोडगामी तोक्तु। मिनु परमप्रभु यावे आ स्वर्ग डा गेय पाइबमी मेको एफिसस ढोडोडगा चोक्शा, सांचो पाइश्शा, छाप थोक्ताक्व। मोपा मेको ठेयब बुस्स कली हजार का बर्स सम्म चोक्तु। मिनु हजार का बर्स नोले मेको छिन का कली प्रोंइचा पुंडसीब।

### हजार का बर्स डा सासन

४मिनु नोले गो नित्तीकपुकी ताता। मेको नित्तीकपुकीमी मुर निश्शो बाक्तेक्म। परमप्रभु यावेमी मेको आन कली निसाफ पचा गेप्टु। मिनु नोले गो येसु कली थमा सुइश्शा, आ लोव्र नु परमप्रभु यावे आ लोव्र पतीके आन पिया खोइक्चा पुंडसीब आन कली तातामी। मेकोपुकीमी ठेयब जन्तु नु मेको आ मूर्ति कली पूजा मपामे बाक्त। मिनु मेको ठेयब जन्तु आ छाप आन कुप्फीम नु आन गुइमी यो वोइक्चा मबिस्समा

बाक्त। मिनु मेको लेंशा ब्रोंइशा, ख्रीस्त नु हजार का बर्स सम्म सासन पाम्तेक्म। प्रकाश ३:२१; मत्ती १६:२८; १कोरिन्थी ६:२ ५मिनु अर्को लीशो मुरपुकी चहिं हजार का बर्स नोले ला सेंसीनीम। मेको डोंइती डा सेंसीतीके बाक्ब। १थिस्सलोनिकी ४:१६ ६मिनु सु सु डोंइती बेक्शो रे सेंसीनीमी, मेको ग्येरशो नु परमप्रभु यावे आ योव्रशो मुरपुकी बाक्नीम। मेको लेंशा मबेक्नीम। मेकोपुकीमी लेंशा बेक्चा मताइनीम। परमप्रभु यावे नु ख्रीस्त आस डोंइती बाक्नीमी। मिनु हजार का बर्स सम्म ख्रीस्त नु सासन पाइनीम।

### नेल्ल क्येडा नोले डा लडाइ

७मिनु मेको हजार का बर्स नोले सैतान पुं मपाइशो ढोडोडगा रे प्रोंइचा पुंइसाक्व। ८मोपा गूशा, रागी नेल्ल डा मुर आन कली परमप्रभु यावे कली मटिथु, हेंथे गाक्पाइक्तु। हेंथे गाक्बपुकी चहिं गोग नु मागोग माइशो डा मुरपुकी देंनीम। मिनु सैतानमी हिकने मचाप्चा डा मुर आन कली लडाइ पचा कली खुप्ताक्व। इजीकीएल ३८:२ ९मिनु सैतान आ फौजपुकी रागी नेल्ल साप्शा, लडाइ पथ जाक्तेक्म। मेकोपुकीमी येसु ख्रीस्त कली थमा सुइक्ब, परमप्रभु यावे आ योव्रशो आन बाक्तीके नु परमप्रभु यावे आ दाक्शो सहर कली पुम्ताक्म। तन्न स्वर्ग रे मी दोक्शा, मेको पुम्ब नेल्ल आन कली नेक्तीमी।

१०मिनु मुर आन कली मरिम्शो लां शेंब दियाबलस गन्धक रे हुरुर पा ब्रशो मी ब्रतीकेमी हुम्चा पुंइसाक्व। मेकेर ठेयब जन्तु नु जोल पा परमप्रभु यावे आ लोव्र पखु पाइब यो बाक्ताक्स। मिनु मेकेर

बाक्बपुकी नाक्दो नाक्ती गेना हना यो श्येत गेचा पुंइसीनीम। प्रकाश १६:२०

### ठेयब बुश नित्तीके

११मिनु नोले गो ठेयब बुश नित्तीके का नु मेकेर निप्ब कली ताता। रागी नु स्वर्ग मेको कली तशा प्रोक्ताक्स। मिनु मेको आस कली बाक्तीके मबा। मत्ती २५:३१-४६; २पत्रुस ३:७,१०,१२ १२गो ठेयब बुश नित्तीके आ डोंइती ठेयब नु आइक्च बेक्शो मुरपुकी राप्शो तातामी। किताबपुकी प्राक्शो बाक्तेक्म। मिनु गो अर्को किताब का यो प्राक्शो ताता। मेको ब्रोंइतीक किताब बाक्त। मिनु मेको ठेयब बुश नित्तीके आ डोंइती राप्शो बेक्शो मुर आन निसाफ पचा पुंइसीनीम। दोपा निसाफ पचा पुंइसीनीम देंशा हना, मेकोपुकीमी रागीमी बाक्मानु, मार मार पामे, मेको किताबमी ब्रेक्शो पडेशा, निसाफ पचा पुंइसीनीम। यूहन्ना ५:२८-२९; दानीएल ७:१०

१३मेको ठेयब बुश नित्तीके आ डोंइती राप्शो बेक्शो मुरपुकी ते रे जाक्तेक्म देंशा हना, समुन्द्रमी बेक्शो मुरपुकी समुन्द्र रे जाक्तेक्म। बेक्पाइक्ब आ बेक्पाइशो नु बेक्शो आन बाक्तीके रे जाक्तेक्म। मिनु मेको नेल्ल रागीमी बाक्मानु, मार मार पामे, मेको निसाफ पचा पुंइसाक्म। १४बेक्पाइक्ब नु बेक्शो आन बाक्तीके हुरुर पा ब्रशो मी ब्रतीकेमी हुम्चा पुंइसाक्स। मेको हुरुर पा ब्रशो मीमी हुम्सीशो मार बाक्त देंशा हना, मेको निक्शी खेयप बेक्चा डा मेको नोले डा बेक्चा बाक्त। १कोरिन्थी १५:२६,५५ १५सु सु आन नें ब्रोंइतीक किताबमी मब्रेक्शो बाक्मे, मेको हुरुर पा ब्रशो मीमी हुम्चा पुंइसाक्म।

## नक यरूसलेम

**२१** नोले गो नक सरीड नु नक रागी ताता। डोंइती डा सरीड, डोंइती डा रागी नु समुन्द्र जाम्तेकम। यसैया ६५:१७; २पत्रुस ३:१३ **२**परमप्रभु यावे आ सहर नक यरूसलेम माइशशो परमप्रभु यावे आ बाक्तीके रे यिना यिन पाइशशो ताता। मेको सहर ग्युम्ले कली ग्रुमचशो ग्युम्ली खोदेशो दुमशा, ग्योम्सीशा यिशो बाक्त। गलाती ४:२६; हिब्रू १२:२२; प्रकाश १६:७-८ **३**मिनु गो ठेयब निल्तीके रे ठेयब सेंदा का ग्रूशो नेंता। मेकोमी “कोव्रडीन, परमप्रभु यावे आ बाक्तीकेमी मुरपुकी यो बाक्नीम। परमप्रभु यावे मुरपुकी नु बाक्ब। मेकोपुकी परमप्रभु यावे आ मुर बाक्नीम। मिनु परमप्रभु यावे आ मुरपुकी नु बाक्ब। प्रस्थान २६:४३५; येरमीया ७:२३ **४**परमप्रभु यावेमी मेको मुर आन कली लेम्शा, आन प्रेक्कु फिक्ब। मुल रे मुरपुकी मबेक्नीम। मोपतीके रोंका मपाइनीमी, मडाक्नीमी, श्येत यो मजाइनीम। मारदे हना डोंइती मार मार बाक्मा, मेको नेल्ल नुप्तेकम” दे ठेयब सेंदामी देशो नेंता। प्रकाश ७:१७; यसैया २५:८; यसैया ३५:१०; यसैया ६५:३६ **५**मेको ठेयब निल्तीकेमी निप्बमी “नेनीन, गो नेल्ल नक सेल्लुडमी” देंत। मिनु नोले मेकोमी आं कली “मेको लोव्र ठीक नु थमा बाक्ब। मोपतीके ब्रेक्तो” देंत। **६**मिनु मेकोमी लेंशा आं कली “गो आल्फा नु ओमेगा नड। नेल्ल क्येडा डोंइती नु नेल्ल क्येडा नोले डा गो नड। सु सुमी तूतू दाक्नीमी, मेको आन कली ब्रोंइचा गेब ब्वाक्कु बुक्तीक रे मोशा तूचा गेनुड। प्रकाश १:८; प्रकाश २२:१३

**७**सु सुमी सैतान कली ग्रानीमी, मेकोम आं देशो नेल्ल ताइनीम। मिनु गो मेको ग्राब आन परमप्रभु यावे दुम्नुड। मेकोपुकी चहिं आं तमी तौ दुम्नीम। **८**तन्न मुर तशा हिंबपुकी, परमप्रभु यावे कली थमा मसुइक्बपुकी, पापमी ग्रुमशोपुकी, मुर आन कली साइक्बपुकी, तेल्लेम पाइबपुकी, टुना मुना पाइबपुकी, देवी देवता आन कली पूजा पाइबपुकी, नु जोल पाइबपुकी नेल्ल गन्धक रे हुरुर पा ब्रशो मीमी हुम्या पुंडसीनीम। मिनु मेको नोले डा बेक्तीक बाक्ब” दे माइक्ती।

**९**मिनु नोले गो परमप्रभु यावे आ स्वर्ग डा गेय पाइब का जाक्शो ताता। मेको सु बाक्त देशा हना, डोंइती डा ७ जना श्येतमी ब्रीशो डप्का कुरबपुकी डा का बाक्त। मेकोमी आं कली “एके पिवो, गो इ कली ग्युम्ली कोइनुड। मेको ग्युम्ली पाठा आ मीश बाक्ब” दे माइक्ती। **१०**मेकोमी आं कली परमप्रभु यावे आ सोक्तीमी बाक्शा, ठेयब डांडा तार लाइक्ती। मिनु मेकेर आं कली परमप्रभु यावे आ बाक्तीके रे यिना यिन पाइशशो परमप्रभु यावे आ योव्रशो यरूसलेम माइशशो सहर कोइताक्यी।

**११**मिनु मेको सहर दोदेशो तांडसाक्व देशा हना, परमप्रभु यावे आ छेडछेड नु सक्ति पाइशशो बाक्त। मिनु परमप्रभु यावे आ छेडछेड नेल्ल क्येडा रिमशो टल्केशो बुश यास्पेर माइशशो हीरा खोदेशो तांडसाक्व।

**१२**मिनु मेको सहर दोपा सेल्लशो बाक्त देशा हना, मेको सहर आ एर ओंथ ठेयब गारो प्रोव्रशो बाक्त। मिनु मेको गारोमी १२ ओटा ठेयब लाप्चोपुकी बाक्तेकम। मिनु १२ जना परमप्रभु यावे आ स्वर्ग

डा गेय पाइबपुकी मेको लाप्चो का कामी बाक्शो बाक्तेक्म। इस्राएल आ १२ जना तौ आन नें नु थर मेको लाप्चो का कामी ब्रेक्शो बाक्तेक्म। १३मिनु मेको लाप्चोपुकी ते ते बाक्तेक्म देशा हना, पूर्वम लाप्चो सां बाक्तेक्म। उत्तरम लाप्चो सां बाक्तेक्म। दक्खिनम लाप्चो सां बाक्तेक्म। पच्छिमम लाप्चो सां बाक्तेक्म। १४मिनु मेको सहर डा गारोमी १२ ओटा जग बाक्तेक्म। मेको जगमी पाठा आ सोइश्शो १२ जना आन नें ब्रेक्शो बाक्तेक्म।

१५मिनु गो नु लोव्र पाइबमी मेको सहर, लाप्चो नु गारो पुक्चा कली सुन के पुक्तीके का कुरशो बाक्त। १६मिनु मेकोमी मेको सहर कली पुक्तु। मेको सहर ४ पाटे चारै सुर बराबर दुइश्शो १२ हजार स्तादीयोन बाक्त। आ ग्येत्थ गे यो मोशोन दुइश्शो बाक्त। *स्तादीयोन का १८५ मिटर बाक्ब।*

१७मिनु मेकोमी सहर आ गारो पुक्गानु, सहे का ४४ कुबीत ब्रेम्शो बाक्त। मेको परमप्रभु यावे आ स्वर्ग डा गेय पाइब आ पुक्तीके मुर आन पुक्तीके खोदेशो बाक्त। *कुबीत का गज का खोदेशो, ०.५ मिटर बाक्ब।*

१८मेको गारो बुश टल्केशो हीरा के सेल्शो बाक्त। मेको सहर चहिं सिसा खोदेशो मारेइ मब्वाइश्शो सुन के बाक्त। १९मिनु गारो आ जग नेल्ल खाल डा हीरापुकीम ग्योम्शो बाक्तेक्म।

डोंइती डा जग सरीड खोदेशो नीलो यस्पेर माइश्शो हीरामी ग्योम्शो बाक्त। मेको आ नोले डा जग साफीर माइश्शो हीरामी ग्योम्शो बाक्त। मेको आ नोले डा जग बुश कल्केदोन माइश्शो हीरामी ग्योम्शो बाक्त। मेको आ नोले डा जग

गिगी स्मारग्द माइश्शो हीरामी ग्योम्शो बाक्त। २०मेको आ नोले डा जग सुन्तला रड डा सारदोनीक्स माइश्शो हीरामी ग्योम्शो बाक्त। मेको आ नोले डा जग लल सारदीस माइश्शो हीरामी ग्योम्शो बाक्त। मेको आ नोले डा जग हौ नु गिगी ब्वाइश्शो क्रीसोलीथ माइश्शो हीरामी ग्योम्शो बाक्त। मेको आ नोले डा जग सुन रड डा बेरील माइश्शो हीरामी ग्योम्शो बाक्त। मेको आ नोले डा जग शुश हौ तोपास माइश्शो हीरामी ग्योम्शो बाक्त। मेको आ नोले डा जग गिगी क्रीसोप्रास माइश्शो हीरामी ग्योम्शो बाक्त। मेको आ नोले डा जग लल नु नीलो ब्वाइश्शो हीयाचीन्त माइश्शो हीरामी ग्योम्शो बाक्त। मिनु नेल्ल क्येडा नोले डा जग प्याजी रड डा आमेथीस्त माइश्शो हीरामी ग्योम्शो बाक्त।

२१मिनु मेको १२ ओटा लाप्चो चहिं १२ ओटा मोती के सेल्शो बाक्तेक्म। लाप्चो का मोती काम सेल्शो बाक्त। मिनु मेको सहर डा लांपुकी सिसा खोदेशो मारेइ मब्वाइश्शो सुन के बाक्तेक्म।

२२मिनु गो मेको सहरमी परमप्रभु यावे आ खिं मतड। मारदे हना परमप्रभु यावे, नेल्ल सक्ति पाइश्शो परमप्रभु नु पाठा आंमान मेकेर बाक्नीस। २३मिनु मेको सहरमी नां नु तास्ला दाप्चा ममाल्ब। मारदे हना परमप्रभु यावे आ छेडछेड नेल्ल सहरमी दाप्ब। पाठा मुर आन कली छेडछेड गेब बत्ती बाक्ब।

*यसैया ६०:३,५,११,१६,२०* २४मिनु रागी रागी डा मुरपुकी मेको सहर डा छेडछेडमी बाक्नीम। मिनु रागी रागी डा पिप आन शोंप नु दारस मेकेर चाक्नीम। २५मेको



सहर डा लाप्चोपुकी गेना हना यो रोक्शो बाक्नीम। मारदे हना मेकेर गेनायो नाक्दो मदुम्ब। *जकरिया १४:७* २६मिनु रागी रागी डा मुरपुकीमी आन शोंप नु दारस मेको सहरमी चाक्नीमी। २७मिनु जाम्शा लाइबपुकी, ग्रांग्रा दिचा डा गेय पाइबपुकी नु जोल पाइबपुकी चहिं मेको सहरमी ओव्रचा मताइनीम। पाठा आ ब्रोंइतीक किताबमी नें ब्रेक्शोपुकी ला ओव्रचा ताइनीम।

### ब्रोंइचा गेब खोला

**२२** मिनु परमप्रभु यावे आ स्वर्ग डा गेय पाइबमी ब्रोंइचा गेब खोला कोंइताक्यी। मेको खोला टल्केशो सिसा खोदेशो तांइसाक्व। मिनु मेको खोला परमप्रभु यावे नु पाठा आस ठेयब नित्तीके रे गूशा, *इजीकीएल ४७:१-१२; जकरिया १४:८; उत्पत्ती २:६-१०* २सहर डा लां आ दाते रे पा शाइश्शो बाक्त। मेको खोला ओंथ हांबु नु आइक्ची हांबुमी ब्रोंइचा गेब रवा बाक्शो बाक्तेक्म। मेको ब्रोंइचा गेब रवापुकीमी १२ किसीम डा फल सिप्बाक्तेक्म। महिनामी खेयप का सिबाक्तेक्म। मेको ब्रोंइचा गेब रवा आ सफा रागी रागी डा मुर आन कली सापाइक्चा कली बाक्तेक्म। ३मिनु मेको सहरमी सराप रशो काइ मबाक्नीम। मारदे हना परमप्रभु यावे नु पाठा आस ठेयब नित्तीके मेकेर बाक्ब। मिनु परमप्रभु यावे आ वाइलपुकीमी परमप्रभु यावे कली गेय पाइनीम। *यहोसु ७:११-१३* ४मेकोपुकीमी परमप्रभु यावे आ कुल ताइनीम। मेको आन कुप्फीमी परमप्रभु यावे आ नें ब्रेक्शो बाक्ब। *प्रकाश ३:१२* ५मेको सहरमी गेनायो नाक्दो मदुम्ब।

मिनु मेको सहरमी बाक्ब आन कली बत्ती नु नां आ छेडछेड यो ममाल्नीम। मारदे हना परमप्रभु, परमप्रभु यावे मेको आन छेडछेड बाक्ब। मिनु मेकोपुकीमी गेना हना यो सासन पाइनीम।

### एको किताब आ पर्बम

६मिनु मेकोमी आं कली “एको लोव्र नेल्ल थमा बाक्ब। मोपतीके थमा सुइक्ने चाप्नीम। परमप्रभु यावे आ लोव्र पाइब आन सोक्त डा प्रभु बाक्ब। मोपतीके आ वाइलीम वाइल आन कली आ स्वर्ग डा गेय पाइब का सोइक्ताक्व। मारदे सोइक्ताक्व देंशा हना, दुम्चशो लोव्र शेंथ सोइक्ताक्व। आमेन। *प्रकाश १:१* ७मिनु नेनीन, गो फ्रा लेशशा जाक्नुड” दे माइक्ती। सु सुमी एको किताबमी ब्रेक्शो लोव्र नेंशा पाइनीमी, मेको ग्येरसीशो मुर बाक्नीम।

८गो यूहन्ना नड। एको लोव्र नेंता नु मार दुम्चशो बाक्मे, मेको नेल्ल ताता। मिनु आं कली कोंइब परमप्रभु यावे आ स्वर्ग डा गेय पाइब कली सेउ पचा कली आ खोइलीमी बाप्ती। ९मेकोमी चहिं आं कली “मपावो, गो परमप्रभु यावे आ लोव्र पाइब इ लोकबपुकी नु एको किताबमी ब्रेक्शो लोव्र पाइबपुकी खोदेशो परमप्रभु यावे आ वाइल नड। परमप्रभु यावे आ डोंइती बाप्शा मान पावो” दे माइक्ती। १०मिनु मेकोमी आं कली “एको किताबमी ब्रेक्शो लोव्र दुम्चाप्तु। मोपतीके खुइश्शा मवोतो, पढेशा नेंपाइक्मी। *प्रकाश १०:४; प्रकाश १:३* ११सु सुमी पाप पाइनीमी, मेको पामेक्ल। सु सु ग्रांग्रा दिचा डा बाक्मा, मेको मोदेंन बाक्मल। सु सु चहिं ठीक पाइब

बाक्नीमी, मेको ठीक पा बाक्मल। सु सु प्रभु आ मुर बाक्मा, मेको मोदेशोन बाक्मल” दे परमप्रभु यावे आ स्वर्ग डा गेय पाइबमी देंत। *दानीएल १२:१०*

१२मिनु नोले येसुमी “नेनो, गो फ्रा लेशशा जाक्नुड। मिनु जाक्शा, मुर नेल्ल आन कली आन पशो खोदेशो पा गेनुड। मेको आन गेय दोपा पामे, मोपा गेनुड। १३गो आल्फा नु ओमेगा नड। नेल्ल क्येडा डोंइती डा नु नेल्ल क्येडा नोले डा नड। गोइब नु थुम्ब यो गो नड। *प्रकाश १:८; हिब्रू १३:८*

१४ग्येरसीशो मुर सु सु बाक्नीम देशा हना, सु सुमी आन वा मुरमे, मेको आन कली ब्रोंइचा गेब रवा आ फल ब्वचा गेनुड। मिनु मेको मुरपुकी मेको सहर डा लाप्चो रे ओत्रचा ताइनीम। *प्रकाश ७:१४*

१५सु सुमी चहिं टुना मुना पाइनीमी, तेल्लेम पाइनीमी, मुर साइक्नीमी, मूर्ति नु फुल्लु कली सेउ पाइनीमी। जोल पना पन बाक्नीमी। मेको कुचुम खोदेशो पा सहर रे लाडगा बाक्नीमी” देंत। *प्रकाश २१:८, २७;*

*१कोरिन्थी ६:९-१०*

१६मिनु येसुमी “गो येसु नड। गो दाऊद पिपी क्येडा डोंइती बाक्ती। मिनु आ चच युइ यो नड। गो टल्केशो सुक्कुर सोरुल यो नड। गो परमप्रभु यावे आ स्वर्ग डा गेय पाइब कली थमा सुइक्ब आन गुम्तीकेमी शेंथ सोइक्ताकड” देंत।

*यसैया ११:१०; लूका १:७८*

१७मिनु परमप्रभु यावे आ सोक्त नु ग्युम्लीमी मुर आन कली “पिने” देंनीस। मिनु सु सुमी मेको लोत्र नेंनीमी, मेकोमी यो “पिने” देंमल। सु सु तूतू दाक्नी, पिने। मिनु ब्रोंइचा गेब ब्वाक्कु मोशा तूडीन।

*यसैया ५५:१; यूहन्ना ७:३७*

### नोले डा लोत्र

१८सु सुमी एको किताबम ब्रेक्शो परमप्रभु यावेम तुइक्पाइशो लोत्र नेंनीमी, मेको आन कली गो लोत्र का पाइनुड, मार लोत्र पाइनुड देशा हना, सु सुमी एको लोत्रमी अर्को लोत्र तेम्नीमी, मेको सजाइ ताइनीमी। मार सजाइ ताइनीमी देशा हना, परमप्रभु यावेमी एको किताबमी ब्रेक्शो श्येत मोदेशो मुर आन कली गेब। *ब्यवस्था ४:२*

१९सु सुमी परमप्रभु यावेमी तुइक्पाइशो एको किताबम ब्रेक्शो लोत्र खोइक्नीमी, मेको यो सजाइ ताइनीम। मार सजाइ ताइनीम देशा हना, परमप्रभु यावेमी मोदेशो मुर आन कली ब्रोंइचा गेब रवा आ फल ब्वचा मगेब। मिनु मेको मुरपुकी परमप्रभु यावे आ योत्रशो यरूसलेम सहरम ओत्रचा यो मताइनीम।

२०मिनु एको लोत्र पाइबमी “आमेन, गो फ्रा लेशशा यीनुड” देंत। मिनु थमा सुइक्बपुकीमी “आमेन, प्रभु येसु जाक्कीन” देंतेक्म। *१कोरिन्थी १६:२२*

२१प्रभु येसु आ शिशी नेल्ल नु बाक्ल।